

章邱縣志卷之十一

人物志

下

仕績

漢終軍字子雲濟南人少好學以辯博能屬文聞於郡中年十八選爲博士弟子至府受遣太守聞其有異才召見甚奇之與交結軍揖太守而去至長安上書言事武帝異其文拜爲謁者給事中從上幸雍祠五畤獲白麟一角而五蹄時又得奇木其枝旁出輒復合於木上上異此二物博謀羣臣軍上對謂此天之所以示饗而上通

章邱縣志

卷十一

人物志下
仕績

一

之符合也宜因昭時令日改定告元苴白茅於江淮發嘉號於營邱以應緝熙使著事者有紀焉若此之應殆將有解編髮削左衽襲冠帶要衣裳而蒙化者上甚異之由是改元爲元狩後數月越地及匈奴各王有率衆來降者時皆以軍言爲中元鼎中博士徐偃使行風俗偃矯制使膠東魯國鼓鑄鹽鐵還御史大夫張湯劾偃矯制害法至死偃以爲春秋之義大夫出疆有可以安社稷存萬民顓之可也湯不能誅其義有詔下軍問狀軍詰偃曰古者諸侯國異俗分

百里不通時有聘會之事安危之執呼吸成變故有不受辭造命顓已之宜今天下爲一萬里同風偃巡封域之中稱以出疆何也且鹽鐵郡有餘藏正二國廢國家不足以爲利害而以安社稷存萬民爲辭何也又詰偃膠東南近瑯邪北接北海魯國西枕泰山東有東海受其鹽鐵偃度四郡口數田地率其用器食鹽不足以并給二郡邪將執宜有餘而吏不能也何以言之偃矯制而鼓鑄者欲及春耕種贍民器也今魯國之鼓當先具其備至秋乃能舉火此言與實

反者非偃已前三奏無詔不惟所爲不許而直矯作威福以從民望干名采譽此明聖所必加誅也偃窮詘服罪當死軍請下御史徵偃卽罪奏可上善其詰有詔示御史大夫初軍從濟南當詣博士步入關關吏予軍繻軍問以此何爲吏曰爲復傳還當以合符軍曰大丈夫西游終不復傳還棄繻而去軍爲謁者使行郡國建節東出關關吏識之曰此使者迺前棄繻生也軍行郡國所見便宜以聞還奏事上甚說當發使使匈奴軍自請行且曰臣年少材下孤於外官

不足以亢一方之任竊不勝憤懣詔問畫吉凶
狀上竒軍對擢爲諫大夫南越與漢和親廼遣
軍使南越說其王欲令人朝比內諸侯軍自請
願受長纓必羈南越王而致之闕下軍遂往說
越王越王聽許請舉國內屬天子大說賜南越
大臣印綬壹用漢法以新改其俗令使者留填
及漢使者皆死軍死時年二十餘故世謂之終

童

節漢書
本傳

王賀字翁孺其先姓田氏有齊國三世至王建爲

章邱縣志

卷十一

人物志下
仕績

三

秦所滅項羽封建孫安爲濟北王漢初失國齊
人謂之王家因以爲氏文景間安孫遂字伯紀
處東平陵賀父也賀爲武帝繡衣御史逐捕魏
郡羣盜堅盧等黨與及吏畏懦逗遛當坐者賀
皆縱不誅他部御史暴勝之等奏殺二千石千
石以下及通行飲食坐連及者大部至斬萬餘
人賀以奉使不稱免嘆曰吾聞活千人者有封
子孫吾所活者萬餘人後世其興乎賀旣免與
東平陵終氏爲怨徙魏郡元城委粟里爲三老

魏郡人德之

據漢書元后傳
及宋書符瑞志

已上二人舊志未載據王賀傳則東平陵舊有終氏終軍墓亦在境內故併補入

隋房彥謙字孝冲早孤長兄彥雅雅有清鑒以彥謙天性穎悟每竒之親教讀書年七歲誦數萬言十五出後叔父子貞事所繼母有踰本生事伯父樂陵太守豹竭盡心力每四時珍果口弗先嘗遇期功之戚必蔬食終禮宗從取則焉其後受學於博士尹琳遂通涉五經解屬文工草隸風槩高人年十八屬廣寧王孝珩爲齊州刺史辟爲主簿清簡守法州境肅然及周師入鄴以

章邱縣志

卷十一

人物志下
仕績

四

彥謙爲齊州治中彥謙痛本朝傾覆潛謀匡輔事不果而止齊亡歸於家高祖受禪遂優游鄉曲誓無仕心開皇七年刺史韋藝固薦之不得已應命吏部尚書虞愷一見重之擢授承奉郎俄遷監察御史陳平奉詔安撫泉括等十州稱旨遷秦州總管錄事叅軍時僕射高頴定考課彥謙謂頴曰願明公平心遇物遠布耳目精加採訪褒秋毫之善貶纖介之惡非直有光至治亦足標獎賢能詞氣侃然觀者屬目頴爲動容深見嗟賞因歷問河西隴右官人景行彥謙對

之如響類顧謂諸州總管刺史曰與公言不如獨與秦州考使語以秩滿遷長葛令甚有惠化仁壽中令持節使者巡行州縣察長吏能否以彥謙爲天下第一超授都州司馬內史侍郎薛道衡一代文宗位望清顯所與交結皆海內名賢重彥謙爲人深加友敬煬帝嗣位道衡轉牧番州路經彥謙所留連數日屑涕而別黃門侍郎張衡亦與彥謙相善于時煬帝營東都窮極侈麗天下失望又漢王構逆罹罪者多彥謙見衡當塗而不能匡救以書諭之衡得書歎息而

不敢奏聞彥謙遂去官隱居將結構蒙山之下以求其志會置司隸官盛選天下知名之士朝廷以彥謙時望所歸徵授司隸刺史彥謙亦慨然有澄清天下之志凡所薦舉皆人倫表式其有彈射當之者曾無怨言大業九年從駕度遼監扶餘道軍其後隋政漸亂彥謙介然孤立頗爲執政所嫉出爲涇陽令終於官彥謙居家每子姪定省常爲講說督勉之前後居官所得俸祿皆以周恤親友家無餘財嘗從容謂其子元齡曰人皆因祿富我獨以官貧所遺子孫在於

清白耳初開皇中平陳之後天下一統論者咸云將致太平彥謙私謂所親趙郡李少通曰主上性多忌刻不納諫爭太子卑弱諸王擅威唯行苛酷未施宏大天下雖安方憂危亂少通初謂不然及仁壽大業之際其言皆驗唐初追贈徐州都督臨淄縣公謚曰定李百藥爲撰墓碑載金石錄

唐李君球齊州平陵人也父義滿屬隋亂糾合宗黨保固村閭外盜不敢侵逼以功累授齊郡通守武德初遠申誠款詔以其宅爲譚州仍拜爲總

章邱縣志

卷十一

人物志下
仕績

六

管府平陵郡公君球少任俠頗涉書籍貞觀中齊州都督齊王據州城舉兵作亂君球與兄子行均守縣城事平太宗聞而嘉之擢授游擊將軍仍改其本縣爲全節縣君球累補左驍衛義全府折衝都尉龍朔三年高宗將伐高麗君球上疏諫曰臣聞心之病者不能緩聲事之急者不能安言性之慈者不能隱情且食君之祿者死君之事今臣食陛下之祿矣其敢愛身乎臣聞司馬法曰國雖大好戰必亡天下雖安忘戰必危兵者凶器戰者危事故聖主明王重行之

也愛人力之盡恐府庫之殫懼社稷之危生中國之患故古人云務廣德者昌務廣地者亡昔秦始皇好戰不已至於失國是不愛其內而務其外故也漢武遠討朔方迨乎萬里廣拓南海分爲八郡終於戶口減半國用空虛至於末年方垂哀痛之詔自悔其失彼高麗者僻側小醜潛藏山海之間得其人不足以彰聖化棄其地不足以損天威何至乎疲中國之人傾府庫之實使男子不得耕耘女子不得蠶織陛下爲人父母不垂惻隱之心傾其有限之貲貪於無用

之地設令高麗旣滅不得不發兵鎮守少發則兵威不足多發則人心不安是乃疲於轉戍萬姓無聊生也萬姓無聊卽天下敗矣天下旣敗陛下何以自安故臣以爲征之不如不征滅之不如不滅書奏不納尋遷蔚州刺史未行改爲興州刺史累遷揚州大都督府長史政尙嚴肅人吏憚之盜賊屏跡高宗頻降書勞勉時有吐谷渾犯塞以君球素有威重轉爲靈州都督尋

卒官

據舊唐書增補

崔融字安成齊州全節人擢八科高第累補宮門

丞崇文館學士中宗爲太子時選侍讀典東朝
章疏武后幸嵩高見融銘啟母碣歎美之及已
封卽命銘朝覲碑授著作佐郎遷右史進鳳閣
舍人時有司議關市行人盡征之融上疏謂周
官九賦其七曰關市以市多淫巧而關通末游
欲止抑之故加稅耳然唯斂工商而不及往來
今一切通取則事不師古且四民異業舊矣復
動而搖之市者兼受善惡也若甚則細人無所
容細人無所容久必爲亂天下之關必險道市
必要津豪宗惡少在焉聞一旦變法或致騷動

恐南走蠻北走狄今江津河澣列鋪率稅檢覆
稽留加主司僦略邀丐則商人廢業魏晉齊隋
所不行况陛下乎如有師興費廣雖倍算商旅
加斂齊人可也后納之張易之兄弟頗延文學
士融與李嶠蘇味道麟臺少監王紹宗與焉易
之誅貶袁州刺史召授國子司業與修武后實
錄勞封清河縣子融爲文華婉當時罕其四朝
廷大筆多手敕委之其洛出寶圖頌尤工譔武
后哀册最高麗絕筆而死贈衛州刺史諡曰文
膳部員外郎杜審言爲融所獎引爲服總麻六

子其聞者禹錫翹禹錫開元中中書舍人贈定
州刺史諡曰貞翹禮部尚書東都留守贈荊州
大都督諡曰成孫巨右補闕亦有文曾孫從

崔從字子乂少孤貧與兄能偕隱太原山會歲饑

拾橡實以飯講學不廢貞元初擢進士第從山

南巖震府爲推官以母喪免

舊唐書云
以父憂免

兄弟廬

墓手藝松栢喪闋不應辟命久之韋臯引爲西

山運務使奏遷判官攝守邛州前刺史有以盜

繫獄辭已具從疑其寃縱不治俄得正盜臯卒

劉闢反欲并東川從以書諭止闢闢怒從乃募

章邱縣志

卷十一

人物志下
仕績

九

兵嬰城守闢方悉兵拒高宗文戰而敗從完州
自如元和初入爲殿中侍御史遷吏部員外郎
異時吏給選者成牒以先後丐賂從一限出之
後遂爲法九年裴度爲御史中丞奏以右司郎
中知雜事度已相代爲中丞所彈治不屈權幸
事繫臺閣而付仗內者必請還有司薦引御史
務取質重廉退者李翊以寵得京兆尹爲莊憲
太后山陵橋道使務以減末徭費爲功至不治
道輻車留渭橋久不得進從三劾之俄授陝虢
觀察使入爲尚書右丞王承宗請割德棣而遣

子入侍憲宗選堪使者以命從議者謂承宗狠
譎非單使可屈次魏田宏正請以五百騎從辭
之惟童騎十數疾趣鎮集軍士毬場宣詔爲陳
逆順大節禍福之效音辭暢厲士感動承宗自
失貌愈恭至泣下卽按二州戶口符印上之還
爲山南西道節度使帝欲遂相監軍使揣知爲
用事者求金從不肯答用是不得相長慶初繇
尙書左丞領鄜坊丹延節度屬部多神策屯軍
數亂法驕橫吏不能制從一繩以法下皆重足
畏之黨項羗互市羊馬類先遺帥守從獨不取

而厚慰待之羗不敢盜境寶歷初爲東郡留守
故事留司官入宮城門列晨衙見留守吏誕傲
久廢至是復行召拜戶部尙書宰相李宗閔以
從裴度李德裕所善內不喜從求致仕除太子
賓客分司東都告滿百日去於是衆譁語不平
宗閔懼召拜檢校尙書左僕射淮南節度副大
使知節度事揚州凡交易貲產奴婢有貫率錢
畜羊有口算又貿麴牟其贏以佐用度從皆蠲
除之官吏俸帛常加倍以給獨節度使則否從
皆與之同太和六年卒於鎮年七十二下有刳

股肉以祭者贈司空諡曰貞從爲人嚴偉立朝
稜稜有風望不喜交權利忠厚而讓階品當立
門戟終不請位方鎮內無聲妓娛玩士大夫賢
之

崔能字子才朱泚之亂渾瑊以朔方軍戰武功引
佐幕府進累侍御史河東鄭儋表爲判官元和
初爲蜀州刺史六年遷黔中觀察使以讒坐貶
穆宗卽位從爲中丞奏以自代拜將作監授嶺
南節度使與從皆秉節居鎮世傳爲榮卒年六

十八贈禮部尚書

自融子禹錫以下舊志
未載據新舊唐書增補

章邱縣志

卷十一

人物志下
仕績

十一

按唐書元和十五年全節始省入歷城舊志
旣載崔融則禹錫諸人自宜類及至彥曾慎
由以下方於章邱無涉故補錄

附杜伏威闕稜傳

杜伏威齊州章邱人少豪蕩不治生貲與里人
輔公柘約勿頸交公柘數盜姑家牧羊以餽
伏威縣迹捕急乃相與亡命爲盜時年十六
伏威狡譎多算每剽劫衆用其策皆效嘗營
護諸盜出導入殿故其黨愛服共推爲主隋
大業九年入長白山依賊左君行不得意舍

去轉剽淮南稱將軍下邳賊苗海潮擁衆抄
暴伏威遣公柘脅諭之海潮懼卽以衆下之
江都留守遣校尉宋顥將兵捕擊伏威與戰
僞北誘顥墮葭葦澤中順風縱火迫之步騎
燒死幾盡海陵賊趙破陣聞伏威兵少輕之
召使并力伏威引親將十人操牛酒謁輔公
柘嚴兵待變破陣引伏威入幕置酒悉召酋
首高會伏威突斬破陣衆貽駭不及救復殺
數十人下皆畏服公柘兵亦至遂并其衆至
數萬攻安宜屠之隋遣虎牙郎將來整戰於

黃花輪伏威大敗身重創與公柘纔有衆數
百亡去行收卒得八千與虎牙郎將公孫上
哲戰鹽城覆其軍煬帝遣右禦衛將軍陳稜
以精兵討之稜不敢戰伏威遣以婦人服書
稱陳姥怒其軍稜果悉兵至伏威迎出挑戰
稜軍射中其額伏威怒曰不殺汝矢不拔遂
馳入稜陣大呼衝擊衆披靡獲所射將使拔
箭已斬之携其首入稜軍示之又殺數十人
遂大潰稜走進破高郵引兵渡淮攻歷陽據
之稱總管分兵徇屬縣皆下江淮群盜爭附

伏威選敢死士五千號上募寵厚之與均甘苦每攻取必先登戰罷閱創在背者殺之所虜獲必分與麾下士有戰死以其妻殉故人自奮戰無完敵宇文化及以爲歷陽太守不受徙丹陽自稱大行臺始進用士人繕利兵械薄賦斂除殉葬法民姦若盜及吏受賕雖輕皆殺無赦越王侗以爲東南道大總管封楚王是時秦王方討王世充遣使招懷伏威乃獻欵高祖授以東南道行臺尚書令江淮安撫大使上柱國吳王賜姓豫屬籍伏威遣

其將陳正通徐紹宗以兵會取世充之梁郡又遣將王雄誕討李子通於杭州禽以獻破汪華於歙州盡有江東淮南地秦王已平劉黑闥師次曹兗伏威懼乃入朝詔拜太子太保兼行臺尚書令留京師位在齊王元吉上以寵之武德七年二月暴卒初公柘反矯伏威令以給衆趙郡王孝恭旣平公柘得反書以聞高祖追其官削屬籍没入家產貞觀元年詔復官爵以公禮葬仍還其子封伏威有養子三十人皆壯士屬以兵與同衣食惟闕

稜王雄誕知名輔公柝者齊州臨濟人隋季
與伏威爲盜掠淮南據江東唐武德二年授
公柝淮南道行臺尚書左僕射封舒國公後
與伏威有隙其故人左游仙說之反遂僭位
國稱宋卽陳故宮爲都詔遣趙郡王孝恭嶺
南大使李靖齊州總管李世勣等討平之斬
公柝於丹陽傳首京師詳見唐書不具錄

鬪稜伏威邑人貌魁雄善用兩刃刀其長丈名
曰拍刀一揮殺數人前無堅對伏威據江淮
以戰功顯署左將軍部兵皆郡盜橫相侵牟

稜案罪殺之雖親故無脫者至道不舉遺從
伏威入朝拜左領軍將軍越州都督公柝反
稜與南討青山之戰與陳正通遇陣方接稜
脫兜鍪謂衆曰不識我耶何敢戰其徒多稜
舊部氣遂索至有拜者公柝破稜功多然好
自伐公柝被禽乃誣與已謀又伏威王雄誕
及稜貲產在丹陽者當原而趙郡王孝恭悉
籍入之稜自訴忤孝恭遂以謀反誅
舊志以伏威稜入勇略以公柝入侃德今無
此兩門故附見焉又按隋書載杜伏威輔公

拓俱東海人未知孰是

宋李惟清字直臣下邑人父仲行爲章邱簿因家焉開寶中以三史釋褐爲涪陵尉答巫覘給民醫藥宦官督木不法奏殺之改御史請減鹽價復酒耗遷給事充鹽鐵使累官刑部侍郎贈戶部尙書惟清爲人倜儻自任有鉤距所至稱強幹子永錫永德見選舉

金趙鑑字擇善宋建炎二年進士調廬州司理叅軍是時江淮方用兵鑑棄官還鄉里齊國建除歷城丞轉長清令皆劇邑難治鑑政甚著劉豫召

章邱縣志

卷十一

人物志下
仕績

十五

見遷直秘閣提舉涇原路弓箭手兼提點本路刑獄原州守將武悍自用以鑑年少易之鑑發其姦守將坐免郡縣聞風無敢犯者齊廢除知城陽軍改山東東路轉運副使攝行臺左司郎中行臺宰相欲以故宋宦者權都水監鑑曰誤國闡豎汴人視爲寇讐付以美官將失人望遂不用以母憂解職天德初起爲濟州刺史移涿州海陵召鑑入朝應對失旨遣還郡俄除知火山軍以病免大定初起知寧海軍秋禾方熟好蚘蟲生鑑出城行視蟲乃自死再遷鎮西軍節

度使改河北西路轉運使致仕卒

見金史

按舊志有兩趙鑑一列於宋一列於金且云
或一人或二人俱不可考誤

元劉鼎博聞強記才智捷出以軍功累官至郎中李

全攻濟南鼎以書諭之全卽引去仕績詳程鉅

夫撰碑載金石錄

據墓碑改補
碑文全作泉

王瑾十五爲縣吏尋充府吏補三司掾出職丙子
之亂以勞授章邱縣丞累官至懷遠大將軍在
樂安鹽使時山東歲饑瑾以鹽利贍軍有功後
充左右司郎中十有餘年以老致仕邑人李灝

章邱縣志

卷十一

人物志下
仕績

十六

爲撰墓碑載金石錄

據墓碑
增補

段徽字君美其先阜城人後周顯德時舉族遷章
邱嶮山之西因家焉父如楫嘗爲濟南錄事功
曹徽早孤嫺書數通史事弱冠爲歷城縣掾史
值金季貞祐初寇盜充斥徽以方畧招撫民得
少安遷忠勇校尉充章邱縣主簿秩滿授濮陽
縣丞元初有濟南大行臺清河公知徽有經濟
才辟爲幕府經歷累有功授廣威將軍充行臺
叅議嘗從行臺畧定疆土數千里後行臺奉命
南伐徽時居喪檄召之往路次見軍士有逃歸

者乃勸行臺悉出所有銀絹賞賚之軍士大悅
逃者復還既克河南師旋仍治濟南舊所徽以
荒亂甫定人心稔惡於是修城池官署倉廩府
庫幹桑麻魚鹽之利以厚民財積芻茭糗糧之
用以備歲計均戶之貧富以科稅驗丁之多寡
以給役號令一新民皆安堵事行臺清河氏三
世前後凡三十餘年深得爲政之體考績稱第
一以年老乞歸卒於家葬嶮山子女各五人其
一女適行臺次子邳州行軍萬戶張邦直濟南
路叅議張泰亨銘其墓碑詳金石錄

據墓碑
增補

按通志載元代人物傳有張榮歷城人始據
濟南後以兵與地歸降太祖授山東行尚書
省兼兵馬都元帥知濟南府事癸巳入汴梁
凡金之遺民降將皆厚撫之河南民北徙皆
至濟南世祖卽位封濟南公子七人皆登顯
職云云墓銘所謂濟南大行臺清河公者其
姓張氏無疑未審卽張榮否俟攷

許珍弱冠充兵以勳勞勅授盤陽軍節度副使莅
政尚寬簡撫愛士卒深得軍民之心子宣以軍
功授清河相公銀符印信管領軍民總把

許琮宣之子有勇畧善騎射承襲父職出入行陣
間三十餘年未始有怠自中統改元有青社寇
入境作亂琮拒戰有功蒙行臺清河相公賜縑
二百餘端明年議遣屯戍於沂郟改充爲百夫
長授俸秩二十七貫至元十二年管領本翼軍
馬權千戶事次年春上命防衛寶貨船至高郵
十字河值劫賊琮戮力奮戰賊畏而遁奏聞授
忠顯校尉銀符印信旋授昭信校尉管軍總把
千戶事權總管府事

已上二人據慶元村
東許氏墓碑增補

趙通少魁岸有膽畧一時豪俠皆歸之金季河朔

章邱縣志

卷十一

人物志下
仕績

十八

無主萬民敖敖不自保通慨然爲倡鳩衆結寨
柵以保護之時濟南王贇授公以都統備東西
青齊之衝據山傍險以爲固至戊子歲元帥收
復山東率衆歸命授右監軍章邱縣令設方略
平益都師還帥欲引通見上通曰濟南左右當
安集恐去後有反復帥首肯之遂留通濟南行
省依舊監軍後行省南征因年老告致令子進
承襲進後南征有功授給劄件銀符印信旋以
病告長孫玉承襲克紹前烈至中統壬戌益都
李壇作亂盜據濟南上徵燕南諸路軍兵築夾

寨以困瓊玉疾次孫璧代行都督行省因奏璧

有功特贈宣命銀符印信

據獺河西鞏家莊墓碑增補

高聚顯之子承襲父職加軍民鎮撫兼兵馬事在

官二十餘年著廉潔名子五人長子全見忠節

傳中統二年次子進承襲

高進弱冠襲父職充百夫長圍李瓊守沂州修郟

城皆有力焉後應正陽之役由安慶府渡江到

丁家洲獲功屯鎮江攻常州青沙門獲功授樞

密院劄付掠杭州渡錢塘江到天台嶺經福建

諸路且戰且進殺敵無算還守淮泗未幾復隨

章邱縣志

卷十一

人物志下
仕績

十九

劉招討取三峯寺討江山寨收黃華賊既定還

鎮淮安授散官進義校尉收鍾明亮事畢於鳳

凰山開治河道上海巡鎮而還進披堅執銳攻

城野戰三十年百無一失歿賜祭葬

已上二人據高氏世

德碑增補碑在臨濟東北里許

姚興成之子先世齊河人金季避亂居陽邱南羅

莊未冠代其父執戈行伍間已自振拔不凡始

戍下邳大帥一見知其可用因以自隨會宋人

入寇帥引兵赴之戰於淮安之巴泥蕩興呼躍

奮擊立斃十餘人賊衆潰走因追殺其主將帥

壯其勇銳假以弓矢歲己未元兵臨鄂渚興以
力戰獲賜白金錦綵異等及大軍再舉從潭州
取江寧皆有殊績屢獲銀孟繒帛之資江南平
遂入爲禁旅授敦武校尉親軍百夫長尋賜銀
符忠顯校尉邑人劉敏中爲撰墓碑

據縣治西
南南灤莊
墓碑
增補

王成初從軍屯戍河口有功擢爲百夫長旋攝都
鎮撫事至元初有事江淮成提本軍會諸道兵
以畧南土攻五河破青口下淮安取昭信累著
功績江南平復還禁衛授敦武校尉管軍總把

章邱縣志

卷十一

人物志下
仕績

二十一

據縣治西南河
下莊墓碑增補

張如砥字周道邃於國言蚤掾湖廣省秩滿調固
安州判官佐長史克盡厥職擢洛陽尹剔蠹煦
枯翼厥善良歷尹舞陽上海所至百廢俱舉考
課嘗爲諸縣最旣去官民爲立石頌德事詳金

石錄

據墓碑
增補

劉海臨濟莊人罹貞祐亂釋耒耜事戈甲首爲濟
南主相清河公取舉俾充總領陞充五軍鎮撫
破河南屯睢州攻戰有效子天佑

劉天佑代領父職武技精熟莫出其右修立海州

圍困襄陽屯戍沂郊前後凡再渡江無一役不
與者五十餘年間遇敵決勝知機陷陣屢被重
傷勲績最著始百夫長次千夫長陞宣武將軍
總管佩金虎符晚年告歸以壽終賜祭葬子德
忠德明德輝德用

劉德忠幼爲省庭所委監修大都城池又嘗試閱
弓矢中上選旋以勳舊宣授昭信校尉宣武將
軍佩金虎符管軍上千戶竭力奉職克纘先烈
嘗爲兩淮巡鹽萬戶府摘遣禁詰私運捕獲不
法者甚衆人以身幹仰之

已上三人據墓碑增
補碑在臨濟西北十

章邱縣志

卷十一

人物志下
仕績

二十一

五里

張斯立斯和弟幼穎悟日誦數千言及長刻意問
學無所不窺辟山東提刑按察司掾史獨被憲
長甄獎擢江南行臺監察御史累官至戶部尚
書出僉江浙行省事揚歷中外蔚有名卿才大
夫之目大德初中書叅知政事事詳金石錄

據墓

碑改
補

武履常筮仕淮西憲幕書史辨明疑獄脫非辜四
十二人六轉而超授奉議大夫中書檢校提舉
順德鐵冶再爲將作院經歷擢知德州咸著能

聲年未七十力懇致仕朝議加亞中大夫山東

宣慰副使事詳金石錄

據墓碑增補

劉景石以甲科第士人入儒籍後稍從仕以廉直

自立淄萊二州新城驛臺長山三縣咸統於淄

吏治久曠行省檄景石監治期月之間政化大

行旋歷濟南總府山東轉運經歷後以剛潔不

能佞昂以疾免歸事詳金石錄

據墓碑增補

李德侗儻剛直識時務先承乏錄事司官辟攝爲

叅軍差科賦徭不擾而集至元六年補正軍額

檄授百夫長圍攻襄樊復差往修築城堡督役

章邱縣志

卷十一

人物志下
仕績

二十二

如期完葺帥府方錄效拔擢遽以目醫辭退子

三人曰玉曰寶曰璉

李玉驍勇善射通韜畧代父署行戎事父歿葬後

行省撥軍委玉總把沙河排站轉漕饋餉惟本

綱糧運先到未嘗妄施鞭箠亦未嘗非分需科

至元壬申從圍樊城被執堅銳突入南陣生擒

總管唐其姓者以獻又于夜半破犯壘者甲戌

春丞相史公訓練將校見玉貌魁碩屢經任事

命襲父百戶九月征至鄂奉省權劄本翼千戶

十月拔取沙洋城堡活捉守卒二名告貸其死

進攻新城率衆登陴鏃傷左手乃得頭功十二年秋抵金焦二山對宋名將張世傑孫虎臣陳艦迎敵鼓譟急楫直衝其陣大軍從之敵軍悉沒玉軍律嚴明凡維泊處秋毫無犯擢爲省都鎮撫又授忠顯校尉管軍總把省闈通錄前後著明勳績授武略將軍千戶又欽受寶命加佩金符銅印鎮守松江卒年四十有九贈武德將軍千戶侯賜祭葬子珪

李珪襲父職授金符忠顯校尉管軍千戶大德改元差鎮守海門海賊爲亂珪率軍掩捕餘黨盡

章邱縣志

卷十一

人物志下
仕績

二十二

獲延祐初移鎮崇明旋進昭信校尉鎮守通州珪莅政三十五年屢承上司給驛起解封裝錢物一塵不染往復差使十餘次程途不下幾萬里亦未嘗出一憚遠避難之語立功立事有如

是者

已上三人據縣治西南徐馬莊墓碑增補

高信先姓宋世爲歷城人金季避亂徙章邱沙埠村改姓高體貌魁偉有胆畧元丞相伯顏統兵取宋信爲隊長渡江以其屬報效首虜獎以錦二端白金二鎰授都鎮撫暨混一遂不復仕家居奉其兄友樂無間也經理生產賑貸乏絕劉

中庵爲之號曰清沙老人卒年八十有五子四
人文通文本文舉文彘

高文本承務郎龍興路總管府經歷改承直郎集
慶路推官陞奉議大夫河間路陵州知州兼管
本州諸軍奧魯勸農事在官秉正不奪在集慶
率兵捕獲群盜陵州水陸二站傳舍廢壞悉爲
新之其臨事不苟率類此已上二人據墓碑增
補碑在沙埠莊西
程益字光道至順間進士爲國子博士與修宋遼
金史遷監察御史劾宰相不報卽解官歸復起
爲廉訪司僉事

章邱縣志

卷十一

人物志下
仕績

二十四

張友諒

諒舊志作諒今
據碑文改正

字元朴號盤泉斯和子由

奉禮郎累遷吏部員外拜監察御史遷都水使
浙江行省叅政遷翰林承旨知制誥兼修國史
致仕至正中復起商議中書友諒爲人湛靖敦
雅汲引勤懇退見其人漠焉若無所及遇事盡
言綜練政務時稱有幹國器事詳金石錄據神
道碑

補改

魏誼字義甫號白泉爲人通亮有雅名累官福建
鹽運使至尙書

李進初仕爲敦武尉累建功勳歷升都統其孫椿

官都察院奉議大夫濟南路濱州知州驍騎尉
後封章邱縣子子文蔚官沙縣尹文宜官寶昌
州知州從子克良官江西行省文學

按李進爲李椿之祖舊志以李進列元代軍
功而李椿反列於金甚誤

明滿福周一名甫生器宇凝重通經史練達時務縣
尹李彥表聞其名舉爲亭老時元季政舛俗橫
民多枉濫福周悉心平之洪武初以人才應召
授浙江左布政使聲譽藉甚居七年以目疾解
組歸

章邱縣志

卷十一

人物志下
仕績

二十五

喬穩生而警敏偉儀容精法家言洪武初以人才
薦授北平府理問靖難兵過歷下穩獻策稱旨
升北平按察使轉行在刑部左侍郎後以直諫
被譴幾死者三尋乞歸

韓禎博學有機變洪武中以國子上舍授河南道
監察御史清介不染力振風紀遷江西布政司
左叅政尋調廣東卒於官

劉玘永樂癸卯舉人官順德府教授正身作人諸
生化之子淮天順己卯舉人知會稽平易近民
民有去思焉

劉澹淙之弟天順間歲貢生官新樂縣令精吏治
嚴操守淙子來嘉靖初歲貢爲鈞州學正善於
作人多所成就

夏時歲貢生官至兩淮鹽運使人稱厚德長者
遠聽成化間歲貢生官清豐縣教諭有仁厚長者
之稱

劉福成化間歲貢生官雄縣訓導知人善課士
喬岱字希申號龍溪宏治壬戌進士除行人司行
人差滿選授四川道御史出按兩浙鹽政場有
債事者飛章劾退數人時逆瑾盜弄威權侵牟

鹽利以不副其望降謫太平府教授繼遷鈞州
州判值流賊猖狂數萬騎逼城下岱率衆登陴
扞死相守閱八日始解嚴月餘陞永城縣令兵
火之後庫藏空虛城池殘破忽掘城堤得萬餘
金而城郭遂以完善調廬陵縣號健訟岱詳審
得情懲以重典士民帖服地與永豐封土相連
亂賊蜂起無敢撓其鋒者都憲檄岱勦捕遂撲
滅奏於朝有獎勅銀牌之賜初廬陵天旱以風
已五六月矣方莅任卽雲結雨注四郊霑足故
一時有永城賜銀廬陵賜雨之歌年餘陞廣德

州知州尋授瑞州府同知專理軍政凡逃軍之巧於影射者悉勾稽解送之會丁父憂回籍服闋陞山西按察司僉事事無巨細莫不迎刃而解州縣吏民有事案下者多不解行囊卽決斷而歸後以母老乞假卒於家

據閒居集增補

劉相宏治間歲貢生官衡水訓導博學有才士皆奉爲模楷

楊盈字守謙號雙溪正德丁卯舉人初官隴西教諭山右聘分校平陽守欲中其館廩盈執不可人皆躓之後擢潞城令催逋均賦弭盜燭奸有

章邱縣志

卷十一

人物志下
仕績

二十七

神君之稱嘗勘壺關郭氏獄郭氏遣人懷數百金入境卽返又得罪潞州同知莊敬陷之獄潞城數百人泣訴上官乃獲免後又得罪於王僉事擬謫戍布參王崇慶釋之甫出獄卽奔喪歸竟爲僉事所中以不謹罷潞城人立生祠祀之有去思碑記

袁勳字無挾號樂盤正德庚午舉人授同官縣知縣編審徭役具申縣久疲敝民多逃亡金鎖關係三縣交界乞將弓兵六十名均撥三縣編當上如其請同之差銀倍於隣封乃請於上官得

減其俗嫁女論財有年三四十未婚配者乃嚴其令減其財而婚姻以時焉邑多盜自中牟等處來設法堵禦自是不復入境撫按奏保調渭南縣縣之訟牘積者二百餘上司前件未了者二千餘三閱月皆結絕遇詔下卽審倉獄應釋者囹圄爲之一空乃恃才招忌以游詞告訐送部降級歸後請改除藩府遂授衡府紀善後進陞本府右長史著有皇係賢錄女孝經寤言志述武政服製身紀五經見等書二十冊名之曰樂盤心以其爲心思之所發也

據間居集增補

章邱縣志

卷十一

人物志下
仕績

二十八

呂應期正德己卯舉人官常州府通判擢知州旋授平陽府同知所至以清操稱

謝肅智吏員有才幹又工詩能文官山西大同府通判升福建運副所至有聲子九儀嘉靖壬辰進士由知縣累官至兵部侍郎雄縣志稱其興學校崇節義裁冗費懲奸貪六事允治百廢俱新蓋一時才吏云

姜大成字子集號松澗以拔貢中嘉靖順天丁酉舉人揀選河南鄆城縣縣本淳良大成以求瘼祛害之心爲平易近民之政前後贖罪紙價俱

轉發市穀以備賑濟就東巒而造土修武備以禦患撫按走檄交獎以才調知屯留屯乃山西邊地有名巖邑大成仍以治郾者治之稅糧拖欠者爲之遍召欠戶諭以國法示以屬續上納又憫其罷敝均徭有降無陞省里甲之浪費卹孤老之無依民之德之上之賢之與在郾時無異乃力請致仕士庶留之不獲其哭送於途歸哭於家亦猶之發郾城時也壽五十七歲卒李太常開先爲之傳

據間居集增補

王昺字承晦號杏里嘉靖癸未進士初授太常博

章邱縣志

卷十一

人物志下
仕績

二十九

士歷御史叅議副使行太僕按察布政副都御史至南京工部右侍郎致仕歸歷官守法奉公最勤其職巡案河東鹽課積餘銀十餘萬補還先年逋負邊餉其不盡者預解邊鎮以備不足巡真定時獲鹿有李姓繼母將其父閉於室焚死誣其子繫獄待決十餘年昺鞠得其情爲之平反定州亦有李姓者父以惡疾自經繼母亦以誣其子昺亦得其情釋之計凡活負屈男女百餘人撫治西寧番漢錯居邊境靜謐在陝裁抑太監織造料價銀二十餘萬不循舊規分派

直給官銀以彌侵羨以此忤織造太監劉清詔
獄謫官甫逮至京清死獲釋降分守嘉湖道巡
至嘉興違衆抗力築城郭功方竣而倭寇至民
獲安堵湖廣麻陽兵回虜掠男婦子女四百餘
名匿之舟中懼曷檢搜悉放出因訊其鄉貫給
廩食遣還之在雲南溪峒蠻劫掠爲患曷先揚
兵威繼撫諭之衆遂降集儒官輯古經傳語名
曰同倫類訓分給誦讀開竈盤龍江土田獲灌
溉之利室廬免淪沒之虞南中士庶至今感念

之

已見舊志鄉賢錄有詳畧失
宜處據間居集節錄增補

章邱縣志

卷十一

人物志下
仕績

三十

王國生字楨甫號冶山嘉靖戊子科舉人授唐縣
知縣地爲邊方敝邑民習獷黠國生先除火甲
之累約已惜財與民休息叅將盧某怙勢累辱
丞尉國生申暴其惡使不得遂有指揮催督田
賦橫索國生叱之曰徵糧令事也捕盜若職也
奈何操刀代割而反貪餐鼎足乎臨境完滿二
縣因攝篆有惠政遂上陳乞其調繁不行國生
又自恃廉能見上官不能趨承遂被指摘左遷
唐民赴京訴其冤國生決意歸民遂以德政勒
諸石年六十有八卒於家李太常開先爲之傳

據間居
集增補

張應吉嘉靖壬午舉人官湯陰縣令會迎駕以才
幹擢鳳翔府通判旋升開封府同知居官清苦
却餽遺歸田二十年不減寒素入湯陰名宦祠
王儀鳳字應和號梧岡嘉靖乙酉舉人官真定府
通判管倒馬龍泉兩關凡以常例餽送者悉屏
斥之擢知定州有能名遷順慶府同知適西番
不靖委督軍餉儀鳳卽以原封銀兩授令自分
卒以糧多奏捷上賜銀幣又嘗釋冤獄十六七
人擢知思州府首罷支應銀弛官塘之禁土官

章邱縣志

卷十一

人物志下
仕績

三十一

多餽珍異力却之而擊強摧暴不少假士民相
戒曰愍逢霹靂不敢犯二千石其畏服如此丁
母憂歸不起邑人號曰真實平易君子云

張大儒嘉靖庚子舉人授臨洮府推官以清介稱
楊選嘉靖甲辰進士初授行人嘗使雲南却黔國
公之餽轉御史按畿南郡課群士讀書恒陽書
院轉副使備兵易州去而易州人立祠祀之轉
都御史巡撫大同解右衛之圍上賜金幣丁母
憂以邊事奪情起復轉兵部右侍郎總督薊遼
屢捷又陣獲通罕爲質復賜金幣癸亥墻子嶺

失事責在叅將兵察與巡撫而本兵有黃尚書者與選素有隙指通罕爲勾引遂伏法海內冤之所著有按畿南郡諸稿藏於家

康迪吉字道夫號右川嘉靖甲辰進士初授戶部能其職出知太原時有兄弟訟者責其人因慨然曰風俗之偷也汝兄弟垂老不謀旦夕歡乃以錐刀利相爭乎爲吾修學宮訖定曲直月餘其人相抱而泣友愛如少時聞父病卽夜馳騎出聞計墮馬幾死服除守保定卒於官迪吉嘗奉使過家所親疑其篋笥有藏物盡發之惟圖書數十卷而已

章邱縣志

卷十一

人物志下
仕績

三十二

孫進字希止號對荆嘉靖間歲貢生官嘉興府照磨清介絕俗生平無一妄語

張箴嘉靖間歲貢生官新蔡訓導忠實清謹不忝師儒之任

張師雍字公度號悔菴未冠入縣學旣冠遊國學後謁選授代州同知至州輔其長以有爲稱司錢穀立完數十年逋賦以征有善法而動民以天良也操守素嚴峻几奉差委於民一無所擾竟以直同官過失連累棄職歸壽八十餘歲李

太常開先爲之傳

據間居集增補

靳永相隆慶間歲貢生初授內邛訓導遷臨漳教諭內邛志稱其儀字魁偉動履安詳講論可以服人學識足以待問其文集已散佚有喜雪詩三十韻傳於世

弭子立隆慶間歲貢生官清縣教諭博學篤行有古人風

張汝蘊字子發號逢源萬歷庚辰進士宰東安首治猾胥擒劇盜境內獲安渾河溢爲文以禱築土堤亘二十餘里河以不害調獻縣至則汰積

章邛縣志

卷十一

人物志下
仕績

三十二

收公審編均驛騎雪唐郎中齊秀才兩家獄久之新廟學葺公廡修橋梁繕斥堠以及文昌閣文翰亭職官題名碑皆手自記勒邑故無志匝月成書秩滿治行爲三輔最遷南京工部主事時弇州爲大司寇見汝蘊所爲詩嗟賞不已尋居父母憂服除補戶部主事晉員外郎中視驗糧廳積弊盡去出監天津倉錙銖無染值倭犯朝鮮陳奏調班軍借漕糧固守備飭營壘數事俱得請遷寧夏叅議督撫奏以監司兼部務留之津倭平與賜金列郵傳苦驛騷爲定程品非

信節不得橫索稅監王朝激變某帥陳兵待之
汝蘊反覆開說事遂寢宦者馬堂繼至手卮酒
慰勞期無擾百姓宦者悅服減郡稅數萬緡歲
大禋請於上臺出帑金賑濟復大疫捐貲散藥
全活甚衆遷陝西兵備副使士民詣臺挽留不
能得哭聲震野行次邠州以疾歸旋卒所論著
甚富其仕優應惡二種已刊行臨邑邢侗銘其
墓

康大壯字允剛號續川迪吉子性强敏好學由萬
歷舉人任直隸行唐令邑西北兩嶺口故多盜

章邱縣志

卷十一

人物志下
仕績

三十四

甫下車畫策擒捕殲其渠魁萑雀皆爲屏跡又
向刁訟逋賦壯裁決如流不使案有留牘征輸
惟諭令無後期不徒事追呼民感之俗用丕變
莅五載調知大城事邑東子牙河係滹沱滏陽
諸流之委每春漲秋靈驚濤駭浪非溢則潰沿
河州縣皆苦昏墊壯率屬踏勘源委以臧家橋
以下地狹而逼勢直而迅遂議開廣舊河築厚
堤以束水勢請於上官二年而工成以忤巨闖
意回籍後起知山西洪洞縣有奸徒扞網浼友
挾千金以求解壯峻拒之卒伏其辜又奉檄鞫

訊隣邑案牘平反王姓寃獄其人囊金來謝亦
嚴却之尋引年解組歸衣囊書篋外別無長物
壽八十而終已上二人據採訪增補
張如阜字鹿萍萬歷甲午舉人授濮州學正濮邑
廣文每受民詞如阜立罷之爲人端嚴廉毅門
庭肅然善詩工書以疾卒於官

康大猷字允升迪吉季子性孝友兄弟析箸時腴
瘠之間多讓德勤讀工書由拔貢授昌平州判
昌平陵寢重地密邇邊夷又巨闈爲梗易成貝
錦大猷任事後立法簡明以清介著聲故權豪
斂迹而民且暱就之後引疾乞假民扳轅流涕
送諸境享年五十八歲卒於家

章邱縣志

卷十一

人物志下
仕績

三十五

李長茂字明南號拙公拔貢生幼穎異淹貫經術
尤精數學筮仕南皮縣令蔣升陝州知州所至
有能名在京日有參贊某支軍餉會計數日不
得當令長茂計之頃刻立辦因著有筭海說詳
十六卷藏於家已上二人據採訪增補
李庭蓁字茂才號西菴官陝西渭南縣大使潔清
自勵能勤其職

李顯華字太雅武勇有智謀從征白蓮教有功賜

授守備劄符闖季之亂一方賴以安全

已上二人據採

訪並李氏族譜增補

按顯華雖未名勒仕版而有績可紀又膺銜

秩故備載之以見致身報效自有不容沒者

至 國朝之王焯張福嗣亦準此例

國朝李縉明字仲卿順治己丑進士初官大理覆奏詳

覈稱明允督理中河巡察江北釐奸剔弊興利

惠民尤究心經史故分校北闈所得皆知名士

居官每購求遺書手不釋卷一如諸生時致仕

後構別業曰嘯園著有蓄德錄彭門腐草字學

章邱縣志

卷十一

人物志下
仕績

二十六

蠡測嘯園集等書司寇高珩爲之傳

牛天宿字觀薇號次月順治己丑進士初授江西

安遠令以勦寇捍城功擢工部員外歷郎中兩

權蕪湖龍江關有能聲擢知延安府延有虎患

作文驅之虎不爲災以憂歸後知瓊州府瓊俗

市廛貿易男女襍處諭以禮義習俗爲之變因

病乞休歸著有四書正宗安政三畧厚俗令書

海表奇觀百僚金鑑毓秀館草等集行世

郭見龍字瑞野順治年歲貢初授直隸永寧縣令

缺裁改知鳳翔縣勤於政事著有能聲

劉之驥順治壬辰進士任河南商邱令安靜敦朴

勤恪平恕任數載上下宜之擢陞主事據商邱志增補

安錫祚順治壬辰進士官山西趙城令興利除弊

方半載趙城人肖形祀之擢刑部主事據採訪增補

潘颺言字虞謨號韋菴順治壬辰進士授寧晉令

鋤抑強暴驅除盜賊民獲安堵尤能作養人才

集士子面為講解示以束躬砥行之規士皆興

起擢文選司主事未幾被議歸日賦詩自娛倘

徉山水以終新城何世堪為之傳

王濂號樵嵐順治戊戌進士授榮昌令榮昌為蜀

章邱縣志

卷十一

人物志下
仕績

三十七

巖邑值兵燹之後城中戶不滿百濂至招徠安

輯民大悅服邊鄙士不知學為之廣學宮崇禮

教視事六載治行稱第一旋以憂歸服除授河

陰令謹河防蠲灘租平獄讞治法一如在榮昌

時因病歸里未幾卒子大年號天木康熙甲辰

進士宰崑山民亦頌之已見舊志儒林
今據採訪改補

焦毓棟字立庵號吉雲日培子也康熙己未進士

由行人擢考功主事嚴考核有不合輒不署銜

同堂敬憚之授驗封員外郎攝考功員外郎各

省命盜重讞及有司拖欠非關侵蝕者能洞見

委曲具稿陳請二十餘事俱允行旋轉司勳值
西闈磨勘處分毓棟秉公樹議毫無徇避擢考
功郎中尋致仕歸性好施親媼貧乏者任卹周
至家居以讀書課子姪爲樂鄉黨子弟貧不能
讀者悉資之時邑令立陽邛書院毓棟傾囊飲
助優游林下者二十餘年

焦毓鼎字象九號訥庵日培子生有異質篤於行
誼早喪母撫兩幼弟成立有王氏夫婦亡遺幼
女毓鼎收養及長贅嫁之康熙辛未成進士授
鍾祥令鍾祥古郢地當水陸要衝號繁劇毓鼎

章邱縣志

卷十一

人物志下
仕績

三十八

清驛遞滅火耗恤獄囚除里民陋規禁婦女出
訟繕河堤以弭水患廣賑卹以濟民饑六年之
間翕然稱治尤加意作人拔劉性傳仁傳兄弟
於孤寒中己卯分較鄉闈所得皆知名士一時

士民尸祝之

據採訪
增補

周泰生歲貢生康熙三十年宰江安庭無宿訟吏
無隱情勤課農桑改建學校擢貴州黔西牧民

立碑頌之

據瀘州
志增補

王焯邑諸生考授縣丞康熙三十五年率子大器
自備糧馬隨征葛爾丹多著勞績事平給章京

職銜

見舊志
勇畧

張福嗣體幹魁梧有勇力康熙三十五年以鄉勇
隨征葛爾丹三載無失事事平授尉職福嗣不

就

據採訪
補增

李慎修字思永號雪山康熙壬辰進士由撰文中
書擢主事出知杭州府整躬率屬吏治肅清雍
正五年遷刑部陝西司員外郎晉廣西司郎中
歷廣東浙江雲南司左右現審司前後十餘載
多所平反嘗有京官某招一屠人作佃戶并貸
以金屠人妻素淫乘屠醉縊殺之而誣京官某
不能雪事聞命慎修審寃遂白又有某官侵匿
帑金部議以挪移從未減慎修執不可其房師
諷以

上意慎修曰恩出自

上若司官枉法是先自罹於法何以居官乎乾隆元年擢河
南南汝光道有白面包拯之稱紳民爲建生祠
慎修見之命易以范文正公像嘗於城中高阜
集士民講論孝弟睦婣任卹之義多有感泣者
五年調湖北武漢黃德道凡盜竊奸宄聞將至
相率出其境旋調驛鹽道力却舊日陋規以憂

章邱縣志

卷十一

人物志下
仕績

二十九

歸服除補江南驛鹽道

上曰李慎修老成直爽宜授御史職乃改授江西道監察御史指陳時事盡言無隱尋授湖南衡永郴桂道過武昌商人感舊德奉金爲壽終弗受十二年解組歸優游林下者七載著有內訟編吏治卮言倫理至言勸民俗話立繼說恤囚說檢驗說諸書邑人韓尙夏爲之傳

焦綏祚康熙癸巳進士授內閣中書借補奉天府經歷歷權海城廣寧遼陽鐵嶺諸縣事有莊頭侵漁民業悉奪歸還之旗人每私役民間子女

章邱縣志

卷十一

人物志下
仕績

四十

爲奴婢白京兆禁焉遼陽當奏漕時苦霖雨胥吏恒恐悞限乃故寬之至期車牛擔負未嘗後又嘗攝學官篆以古文詞教諸生風氣一變承德令某虧帑數百金綏祚傾囊補助之以母憂歸里不復出嘯傲林泉者十餘年

張夢白康熙癸巳進士初授廣西永福令以簡靜爲治囹圄幾空調宜山宜山之難治者曰三曹其民阻洞而居官吏俱不得見邑有鎮曰德勝去其地數里許洞民往往竊出赴德勝催科者因設役捕之益擾無濟夢白至吏以告夢白曰

此非抗頑必先時有欺其愚駮而無端相擾者
故竄伏不至耳乃盡撤胥役擇幹吏數人往撫
慰之自是出者日衆因就鎮所收租稅以不虧
而民亦不擾其善政率類此

甯之莢字赤生康熙甲午舉人授山西平陸令平
陸地簡朴莢爲修農器教樹蓄勤考課定婚娶
歷任三年政簡刑清邑人杜若拙山右名宿爲
詩以紀其實詩見藝文以乞養回籍遂不出壽八十

有一據採訪增補

王世睿字道存號龍溪康熙乙未進士知四川盧

章邱縣志

卷十一

人物志下
仕績

四十一

山縣減賦除稅撫輯有方會涼山蠻叛從巡撫
征剿駐劄爐建隘口檢閱金川九寺木坪魯密
諸路士兵犒賞調遣軍士効命因語監軍曰蠻
人性不離巢若以圍師必却之術兼用火攻逼
其後賊逸而潰可成擒矣監軍用其言果大勝
獲其渠魁以軍功議叙權天全宣慰土司天全
自唐時歸土司迄今已千餘載世睿至鎮撫苗
民條陳建官吏稽戶口料地畝清疆界編保甲
追軍器六事上官從之天全遂改土歸流後大
兵討頗羅鼐復委運糧由內地至察木往返四

閱月兵餉俱足又從剿烏蒙鎮雄叛逆者均著
勞績旋奉行取巡撫奏留天全舉所議六事行
之夷民大悅擢知瀘州將赴任奉委賫封印金
幣進藏出箭爐雪嶺黑海崑崙歷番國一十有
四在瀘兩載利興弊除因公左遷除江南江浦
縣調上海捕蝗恤賑所至有聲著有進藏紀程
紀遇詩捕蝗記事若干卷

崔可訓字秀卿魁梧奇偉素有智畧家貧不能讀
遂投身行伍時康熙雍正間西寇跳梁 六師
進討可訓執殳前驅從征十二年當兩軍對壘

章邱縣志

卷十一

人物志下
仕績

四十二

不脫甲者四十餘日倦則以足履鐙倚馬而憩
及脫盔髮盡落值元日黎明寇突來可訓執刃
乘馬突入賊軍立斬三十餘級追賊陷入坑塹
中危急間馬忽躍出又奮斃數人大軍乘勢追
襲遂獲全勝奏首功賜職千總事平擢卽墨守
備乾隆九年升遊擊卒於官 據採訪
增補

胡漪字文連號廉泉世藻于以歲貢生候選內閣
中書舍人後改官順天府經歷恪謹奉職有干
以私者輒面拒之委權通判事清操益勵因病
乞歸歿後宮詹比平黃叔琳爲之傳

焦祈年字穀貽毓棟季子雍正癸卯進士授編修
轉御史巡視南城察萬安倉及五城街道皆洞
燭情僞無敢欺者歷掌山西河南京畿浙江江
西各道事凡有關國計民生者均詳悉陳奏授
順天府府丞權府尹遷右通政出爲廣東觀風
整俗使至粵見婦女牽纜卽禁除之下車後一
切事宜無不權衡至當建修十府二州書院延
通人爲之師濱海多盜出則乘艦張蓋吏不能
禁祈年設法鈎捕獲渠魁百餘人自是商無被
劫奸民陳某曾某以符劄煽惑人擒治之赦其

章邱縣志

卷十一

人物志下
仕績

四十二

株連者武舉人余某交結嘯聚偵得其實論如
律西洋人置天主堂愚氓瞻拜無虛日乃逐其
倡教者赴澳門粵俗以正簡閱各營兵有紀律
軍政肅然擢光祿寺卿晉順天府尹旋調奉天
行至山海關以疾歸卒於里

李方泌字衡修雍正己酉拔貢知山西孝義縣孝
義俗悍好鬥民多帶刀劍力禁之除虎患通道
路河決壞民田爲築堰建牖民德之丁母憂歸
以哀毀不起翰林宋弼爲之傳

郝純祉字罄宜奇璋子性敏好學尤究心濂洛性

理諸書貢成均官膠州寧海訓導葺學宮勵士
行遵蘇胡教法諸生悅服後擢高唐學正上官
重其人疏薦於朝以母老乞養歸

見舊志
儒林

焦宏年字公遠毓棟子孝友醇謹以歲貢生授福

山訓導歷招遠高密擢掖縣教諭訓士有方多

所造就凡益於學校者悉力爲之

見舊志
舉注下

焦應年字聲胥毓棟子嗣毓桂爲後由廩貢授膠

州訓導樂育不倦遇歲科試學使每令兼攝萊

府屬事措置裕如觀察嚴嘗稱其非司訓才以

疾卒於官李慎修爲之傳

見舊志
舉注下

章邱縣志

卷十一

人物志下
仕績

四十四

已上見舊志鄉賢門內有宋劉庭式明張應

祿今入義行唐員半千明李淳劉東襲勗劉

璠入文苑張應宿入孝友 國朝張夢李入

文苑

馮士鑄字象九乾隆丁巳進士授山西甘泉令邑

苦嚴寒地力未盡因教以種植肥蔭之法民不

解織紵爲製紡績具募工教之百餘年邑無科

第勤課諸生獎勵鼓舞文運丕振邑北山多虎

招丁役擒捕遂無患洛川之交口爲延綏達西

安孔道山水驟漲請于監司捐廉設渡無病涉

者以疾解組病痊除原官值歲饑爲請帑賑濟
未幾卒於官門人華州王惟一爲之傳

焦爾厚字孔俾號樸村祖宏年父誥曾幼嗜學乾
隆庚午舉於鄉初爲商河教諭擢授甘肅崇信
令教樹畜興學校兩年政有聲調西寧邑爲古
鄯郡通青海藏衛番回襍處好訟習剽掠爾厚
爲申條教布恩信民大服權知河州值大饑置
粥廠數區全活無算已而疫大作存者療之殞
者葬之士民感泣旋以父憂歸服除官長沙府
同知擢知貴州遵義府以廉正寬簡爲治聞母

章邱縣志

卷十一

人物志下
仕績

四十五

計馳歸五閱月而卒平生所至以廉潔稱故官
私多補負性友愛有弟二人終身不異爨著有
樸村詩草八卷

胡予翼號岱峯乾隆庚辰舉人歷知樂平平陸縣
事署汾州府同知授孟縣令值兩金川不靖軍
興旁午孟當孔道予翼支應無誤調崞縣權知
應州所至皆有政聲因病左遷濱州學正卒於
官

郝紹宗字遠衣博聞強識乾隆庚寅舉人任嶧縣
訓導嚴課程以教士多所成就

牛中開字萬平乾隆庚寅舉人初官濰縣訓導後授咸豐令減糧價清積案建義學未久卒於官劉世清字漣漪援例官四川瀘州吏目嚴捕務卹獄囚在任二十餘年民多感之

焦式冲字懷谷乾隆壬辰進士授江南儀徵令服強悍賑災黎卓卓有政聲丙午分校鄉闈取士多英雋歸里後以汲引後進爲任及門多掇科第著有余青園詩集

孟廷對字叔揚號秋崖乾隆丙戌進士授雲南建水令苗棘雜處獷悍不馴廷對寬猛相濟翕然

章邱縣志

卷十一

人物志下
仕績

四十六

稱治後改盧龍移豐潤以徭役繁劇爲捐廉置驛車以紓民力咸愛戴之丁母憂服闋補福建崇安令尤多善政稱神明宰未幾卒於官歷邑汪鏞爲之傳

翟中策字殿颺號清溪乾隆甲辰進士授江南儀徵令抵任時河決於徐儀徵攤辦第五段中策設法疏導四十餘日功乃成費金二萬餘未嘗絲毫擾間里有劉姓操舟爲業晚繫纜於樸樹灣至夜櫂夫被殺有以舟子婦方中年疑之者中策置不以問越五旬得賊於蘇州關下獄成

而不寃一人旋調江西高安令邑有王三秀少聘劉氏後家貧劉悔議中策以大義曉劉給王錢帛使成禮尤留意文教按課程手定甲乙又刊戒溺女文課日各授一卷俾向村愚解說俗爲之變會丁母憂歸服闋任四川萬縣除盜賊賑荒災區畫明敏爲諸邑最年七十卒於官

史誠儀字醇夫幼喪父事繼母以孝聞乾隆己亥舉於鄉時年十八後除唐縣令邑西有倒馬關山徑叢雜綿亘百餘里奸宄匿跡其間誠儀申條約嚴偵察境內肅然唐河舊無堤埝山水驟

章邱縣志

卷十一

人物志下
仕績

四十七

發輒漫溢爲築埧以保田廬旋調大名界連豫東二省驛騎嘗不足用捐廉置馬三十餘匹值瀝水泛漲被災者四百餘村誠儀躬親履勘計需賑米萬石上官難之力請乃得行發賑之先依報冊戶口按村榜示吏胥無由染指直省俱奉以爲式擢署通州尤稱繁劇禁貼車舊例捐置任載大車十兩或不給皆官爲僱備行旅稱便聽斷公允案無留牘有同室爭訟者諭以大義皆感泣而去未久卒於官大學士德州盧蔭溥爲之傳

李秉瑜字瑾齋乾隆己亥舉人初官泗水寧陽教諭旋授濮州學正捐修學宮學署創建文昌祠值河水爲患教匪滋事防守賑濟與有勞焉老病乞歸終年七十三著有濮陽詩集

焦以潤字玉甫號綠軒爾厚子幼穎悟工詩古文詞父遠宦黔中侍祖母李母耿家居祖母歿以二十七日馳達遵義奉其父歸父旋卒哀毀逾常乾隆己酉成進士選授河南虞城令樂易親民勤於聽斷瀕河地灘徙不常有地已灘荒而仍責租賦者數千畝請於上官固爭之得免邑

章邱縣志

卷十一

人物志下
仕績

四十八

舊俗計里出車供繇役以潤減其數以紓民困民大悅有焦青天之稱母耿卒於署將扶櫬歸而河決衡家樓上官留辦工料辭不獲役竣奉喪回里已而奏留河南補涉縣調淮寧所至除陋規敦士習與民休息後卒於官著有竹濤偶吟候鳴草二卷

牛中瀚字滄若號耐軒性孝友善屬文工書乾隆丁酉拔貢癸卯順天舉人由四庫館議叙授保康令其地山深民稀多盜賊中瀚嚴治之盜皆遁跡邑人素不知學乃與生童約期課試士風

日振時有安南之役襄陽守檄出夫馬千餘中
瀚力請得免權黃陂四十餘日判積讞八百餘
案人皆帖服以父憂歸服除檢發甘肅知文縣
事遇有重犯縣役憚於招解往往將罪人陷之
白水江爲嚴禁絕之文邑地近川陝時賊匪未
靖中瀚修城池核丁壯密爲之備嘗奉檄調民
入城團練懼擾民遂具文力陳令民自行團練
上官賢之又奉檄發運川糧至畧陽賊劫糧千
餘石民以德官故悉爲補運旋丁母憂賊匪猝
至距城僅數十里新令不知所措遽閉門民避
難者不得入繞城而號中瀚墨衰出令啟城門
使民入復督鄉勇力守城賊見有守乃趣畧陽
去後選湖南安化令未幾卒於官工部員外郎
牟昌裕爲之傳

張冠軍字勇三有勇畧乾隆間入戎行習騎射撫
憲長甚器之授撫標左營司廳旋擢禹城汛把
總會川楚賊匪久未平至嘉慶初復揀汛司有
幹畧者往往之冠軍與焉抵軍所值大雷雨賊
衆數萬猝至衆皆驚冠軍不爲動單騎禦敵曾
不少挫繼我師與賊隔一兀突河相持月餘冠

軍乘夜匹馬渡河偵知賊方設夜宴優俳雜進多有醉卧者馳歸白主帥身率士卒奮勇爭先遂奪賊寨二十四處竟夜之力且戰且進得賊佔據地二百四十餘里主帥叙勳冠軍居最凡歷行陣計七年親督百餘戰臨幾決策所向無敵後擒其賊首羅其清陝甘諸部落亦取次削平於七年九月凱旋以功授梁山營都司調沙溝營都司遂卒年五十四歲

董瑄字又薛乾隆丙午舉人官安徽全椒霍山蒙城廬江諸縣令凡刑名錢穀事無鉅細從不委

章邱縣志

卷十一

人物志下
仕績

五十

任幕友決獄用刑尤慎且興文教除强悍所至有聲著制藝綱目一書以訓後學若趙宗謙葛鴻奕李豐芑皆出其門

王元培字均調英敏精悍工詩文兼通武畧乾隆壬子科舉人嘉慶辛酉挑一等以母老就教職選博平訓導訓諸生如子弟無稍倦以丁母憂歸服闋選金鄉教諭時嘉慶癸酉金鄉教匪李卓立等將爲亂與縣令謀預備之不獲請遂密報學憲移咨撫憲偵訪之捕獲教匪頭目崔士俊等二十餘人至九月變作元培與縣令分城

而守購礮石補城垣戎裝劍佩一時倚爲干城
迨河鎮二標兵至賊遂敗而西金鄉之先事有
備不至變生莫措者元培之功爲多事平以疾
歸著有東縉守城紀事一卷及均調詩抄

李迺蕘字桃仲歲貢生賦性純篤處事明敏歷署
博山嶧縣臨朐商河訓導授高唐州訓導誨迪
人材循循有法子法祖亦歲貢生工詩著有對
山草堂集

馬汝舟字濟川年十二爲郡學生嘉慶辛酉成進
士授襄垣令勤聽斷獄無冤濫督課諸生多所

章邱縣志

卷十一

人物志下
仕績

五十一

造就故事常平倉穀歲歉平糶秋成還倉有司
官往往爲吏胥所蒙假出陳易新之名春派領
糶秋後則數倍其償民用以困汝舟終任無出
納粟亦弗壞市物有官價者除之癸酉分校鄉
闈主司謂其得人時滑縣教匪滋事縣有廐亭
爲衝途百姓聞亂驚懼汝舟安撫之居官六載
以目疾乞歸終年七十有六著有貽穀堂詩文
集

甯自學字殖亭嘉慶壬戌進士授甘肅秦安令邑
多稅任事後擇其不奉上者悉去之邑有春雨

書院久圯爲除治補葺延師考課又設義學廣教化士氣一振旣匪起東南相距僅百里乃謀於邑人用備堵禦之具一切甲士糗糧驛站芻芟悉捐俸償之一時士民咸誦之乞假歸秦人攀轅流涕以送晚教授沂州多所陶成著有論語析解學庸滙成太史張位爲之傳

王景輿字敬亭由館班選授直隸鹽庫大使擢南皮令調任邳後官奉天歷知蓋平廣寧承德縣事和易近民長於聽斷所至以廉能稱權知錦州府兼權奉天府治中除新民廳撫民同知每遇大差民間貼差甚苦景輿至盡行革除旋致仕歸衆士民以四千金贈行却弗受家居和族黨邨朋舊訓諸子以義皆克振拔子五人維墉官浙江屢任劇邑調嘉興令餘見官階諸孫中入膠庠者二人終年七十有九

義行

宋劉庭式字得之舉進士蘇軾守密州庭式爲通判初庭式未第時議聘鄉人之女未納幣庭式及第女以病喪明其家貧甚弗敢復言或勸娶其幼女庭式曰吾已許之豈可負哉卒娶之生數

子後死竟不再娶軾問之曰哀生於愛愛生於色今君愛何從生哀何從出乎庭式曰吾知愛吾妻而已若緣色而生愛緣愛而生哀色衰愛弛吾哀亦忘則凡揚袂倚市目挑而心招者皆可以爲妻也耶軾深服其言庭式後監太平觀老於廬山以終

見舊志鄉賢

張中宣字元忠虞曹員外郎嘉祐五年執親喪居里率同人勑立夫子廟并左右室若干楹見郭灝夫子廟記詳金石錄

金劉照字明遠有才學以貲財雄鄉里明昌初大旱

章邱縣志

卷十一

人物志下義行

五十二

發粟濟貧遠近疏戚咸賴焉子珂居兄喪不御酒肉三年太和間自冬至春太雪珂爲粥于門以食餓者

據劉鼎墓碑詳金石錄

張仲金季率諸子力田置家塾申孝弟之義里俗

爲之一變

據張氏墓碑增補

王宏字彥博幼敏慎工書長通習吏事補縣吏尋擢郡曹俱以廉平稱興陵朝越王出知濟南選充書掾言動端謹王雅重之將薦之朝辭不就退居鄉閭間平心率物人有爭訟者輒訴於門宏必諭以禮繩以法要厓於無事其有悍戾弗

率者更飲之酒人亦化之承平之時朝廷重以爵與人仕子當廕補者率得任官保識皆連其告身於縣於府委官對驗然後奏補故簪笏之家阨于無津邑有王姓故觀察之後自拔無由宏遂引致達官得其狀階之以仕後以廕叙及困躓連蹇久不能調者輒力爲賑給使獲銓調而後已壽六十六子四人其顯者瑾載仕績瓌

見選舉

據王氏墓碑增補載金石錄

元武文煥武德子襟量夷曠昆弟求析產者辭多受寡農人侵其田畔輒讓之有友貧無以爲葬遂

章邱縣志

卷十一

人物志下義行

五十四

慨然鬻白金瓶以贖

武立禮文煥孫履常子當讓其季以諸生發身

繇澗省掾爲襄陽路知事時以好義能讓聞

上巴

二人據武氏恩贈碑增補

崔榮字壽甫延祐七年大水壞民田廬出粟六百

四十斛賑之

據崔氏墓碑增補載金石錄

姚成姚興父善騎射勇力過人都師馬喜其奇傑妻之意立功封侯可立致而成以先世勤儉務農未敢替先業命中子興宣力戎行已則敦率子弟以力田爲務會青州李壇叛民失其業無

所得食成出粟五百斛賑之兵荒之際田野蕭然成立柵欄種禾耕耘自若會親王督兵過其地成進酒穀王爲之下馬嚴其令禾以不損亂定又出粟二百餘斛以濟鄉里春末無籽種則又分給里人人共感戴之

據姚氏昭先碑增補

張林事母孝少不怡卽前稽顙謝不輟嘗負如泰山母恐其罷爲減膳林蹙然爲易以車蒲其輪躬輦以行所居邇溝澮當夏秋淫雨水奪其途乃購石以梁其上子寬性純篤與人交肫肫無勝心歲時爲食于途以待饑者人謂有父風事

章邱縣志

卷十一

人物志下義行

五十五

詳金石錄

據張氏先塋碑增補

明康濟民爲刑省掾同舍掾有醉而遺金者濟民晨起出所遺歸之有少婦遇盜憑垣呼救濟民謂禮不可廢命童子梯下之事親亦能先意承志一時稱爲篤行善士云

張可壽字福同李氏舊僕也李氏原籍江南海州其先人爲方正學之友永樂初遇禍死幼子顯甫離襁褓可壽竊負逃居章邱大溝堦復徙舊軍鎮始至無以爲生乃賣十以給顯長居人知其故無敢與爲婚者其妻田氏欲子之可壽曰

乘人之危不仁干主之分不義不仁不義吾不爲也以女妻之家亦稍裕其後李氏子姓蕃衍

春秋奉祀必及於張

據採訪增補

襲彪少時爲縣官輸租詣京師見遺錢百緡彪致之車中及前見遺緡者悉歸之又嘗代宗人償粟三十斛卽受者亦不知爲彪粟其好施不自德類此

高智字承慧藩司承差辦事吏部能伏事大冢宰得其心將選以家無次丁歸養父母於繼母宋尤能持禮盡職有三妹各與百金以資其衣食

章邱縣志

卷十一

人物志下義行

五十六

於欠債者歲終貧不能償且致餽以爲迎歲計而焚其券

張應祿字學卿舉人苦讀嘗甃石塞其門性耿介好義里有高道者子婦及笄以家貧不能娶應祿爲之備禮畢其姻庠友徐祺父從軍而歿助以貲歸其喪父繼美慮其妹家計艱苦遂割腴

田數畝與之

見舊志鄉賢

高龍字濟時嘉靖年督役修學宮詳慎公平邑令嘉獎之

王雲鳳字治祥業商賈好濟貧拯危邑有木姓作

房山令被議褫職赴京辯復百費悉爲之經理
客死又助之貲使歸葬焉

王道盛尙義輕財廣交子應徵亦有善人之目
楊環廩膳生守義不阿上司曾問縣官官如何環
應以望除害安民後縣官讓之環言明府相愛
乃一人之私直陳乃衆人之公縣官竟奪職去
環以歲貢作定襄縣訓導有賢聲

子翰宏治年歲貢生正德初闈瑾聞袁公冕名欲
致之門下教其從子公冕辭因延致翰清介自
飭一毫不干預求者雖積金滿前不顧也瑾誅

查其黨與獨翰無片紙相往還公論以是高之
馬廣以天性樂施人因字以濟周勇決有膽畧以
務農大其家喜濟窮困嘗捐財爲義社族凡下
戶四十餘人馬價徭銀俱爲代輸他姓貧者亦
多依之善製藥以應病者無弗愈尤精騎射正
德間流賊張興張旺等三千人屯駐埠村分掠
四出有七十餘騎直捩大冶廣挾弓矢躍馬橫
衝賊皆驚散嘉靖丙午春萊蕪巨寇吉關等二
十四人白晝劫人亦據埠村爲巢廣令長子爲
應躬率精勇至寇所遠射近屠止逃一崔倫餘

俱肝腦塗地矣次年有楊龍楊虎兩兄弟誓衆二十餘人晝劫隣村范思升已有救援者廣從而助之二楊殪死餘悉逃竄自是絕警者十七八年子旣閑旣同俱庠生享壽七十五歲李太常開先爲之傳

王階字士登號雲峯性剛直而養以和平人有過嘗面折之有難必拯救之一指揮緣事久困無以自脫階乃揭社中錢助之指揮問其姓名不告而去

張錡字宗器踈財仗義嘗携貲爲賈得利獻二親

章邱縣志

卷十一

人物志下
義行

五十八

并周其黨與所識貧乏者嘉靖庚子詔八十者給肉帛榮以冠帶錡與焉壽至九十二歲其婿

李開先爲之傳

已上十人據
間居集增補

呂應魯萬歷二十一年歲大侵輸粟百石助賑撫院奏給冠帶並旌其門

孟漢臣字朝宗天啟末寇近章邑鄉民多走避長白山漢臣族丁衆多力爲護守民皆賴之寇平事聞給冠帶並以公正忠信扁獎之

據本家開
報云有族

譜並廟鐘可
攷故增補

劉鸞太常祿之祖富而好施歲凶嘗貸粟百餘石

以濟饑鄉人感德稱爲樂善云

據劉氏墓碑增補碑載金石錄

李大宗字衛宸諸生醇謹仁厚尤尚敦睦從弟箕五幼失怙恃大宗撫養教誨及箕五入庠始異其居

李毓芳字含章諸生教授鄉里不受脩脯尤貧者

且助以膳粥一方稱爲高士

已上二人據李氏族譜增補

楊惟中瞻於文樂善篤誼嘗爲其姊姜守身妻及

侍女盛兒倡建雙烈祠

據雙烈祠碑記增補

沈孝先字時慶號湖東性慈好施少由胥掾司齊東戶曹有負私鹽而販者久羈不詢其妻鬻女

章邱縣志

卷十一

人物志下義行

五十九

以金求援孝先惻然出金贖還亟請邑令釋其罪後考績京寓值夜雨夢前犯大呼孝先覺出戶私焉而墻頽覆寢榻人以爲陰德顯報也始授山西大同玉林場繼除應天句容雲亭驛後優游林壑萬歷己卯以優老旌其門壽九十二

歲

據墓碑增補

李縉驤字日閑諸生公正好義同里竇蔚少貧嘗令與子課共讀同衣食後蔚成進士官監察御史視驤如父人以爲樂育友教之報也

據採訪增補

國朝王銘盤邑諸生性慷慨識膽過人順治十二年土

寇猖獗銘盤親往說以大義招撫之巡撫于表

其廬曰仁人君子卒年八十有三

見舊志
勇略

張秉忠樂善好施同里貧戶共逋租五十餘金秉

忠代爲輸納歲歉施粥濟饑凡貧不能婚葬者

咸助之朱尹兩學官表其廬

高升秀邑諸生好施與贍族濟困康熙甲申歲歉

有里人婦方寡貧議再醮三子幼升秀諭以大

義收養之母子得完聚累舉鄉飲年九十而終

邑令馬表其廬

王養賢好善樂施始終不倦邑人李祖耳等公舉

章邱縣志

卷十一

人物志下
義行

六十

義行縣令張扁獎之

高志禎早喪父侍母盡孝兩兄相繼歿敬事孀嫂

處鄉黨睦婣任恤解紛弭訟有古人風

甯永裨字肇先增廣生住刁家莊慷慨尚義莊臨

瀨河雍正十一年西堤冲决數百丈勸捐築堤

勤勞特著又嘗首請學憲升章邱爲上學里人

共德之

據採訪
增補

李之麟字玉書邑諸生性嚴謹敬老睦親周卹貧

乏嘗語人曰聖賢道理一著心檢點日用間在

在遇著人多賢之

見舊志
儒林

張邦孚喜施予所居莊側有石河夏秋漲溢往來者多病涉倡義集貲築巨橋行人利之年九十餘終

高如峇字峻生勤苦治生家稍裕慷慨不吝邑中義舉如學宮奎樓橋梁道路其始則峇爲之倡其成則峇爲之終又捐貲於廣濟堂邑令章以聞上臺扁獎之

郝厚祉

中一字恭避御名下一字

字百祿奇璋子天性孝友母

年九十餘左右就養凡飲食供奉悉躬親兄弟相繼歿遺子六人撫教之又設義冢施棺木贖

章邱縣志

卷十一

人物志下義行

六十一

子女救寒餓鄉閭貧匱者依賴之以歲貢生爲福山學官亦獎訓有方臨終告其子曰人負吾貲不能償者尙五千餘金可悉焚其券邑人韓尙夏爲之傳

高登旺字際九歲貢生性和易無疾言遽色犯者未嘗與校有貧婦盜其稼高遇而詰之婦素不識高曰吾盜高際九麥於爾乎何與高曰際九卽來矣可速攜之去其雅量類此邑人李慎修述其行事與柏超張珮爲三善合傳云

柏超少業鍛鐵後家漸裕有弟析居已久弟歿召

弟之妻同居延師課其子成就之凡有稱貸無不與亦不責其償老弱跛疾之貧者咸詣超家爲傭或以詰超曰一人豈無半人力乎其厚德類若此

張珮幼負販生計漸裕好濟貧扶困子姪輩俱勤儉克家時修青龍山廟珮捐助之力爲多

高鳳池字協遠邑諸生早喪父繼母性嚴毅鳳池委曲奉養撫兩幼弟成立歷城令李某委解邊餉有內顧憂鳳池爲經紀其家李歸幣酌之却不受邑廣文高某以病噎解官歸潛購櫬木尾

章邱縣志

卷十一

人物志下
義行

六十二

之行抵家越一日而卒時巡撫岳獎掖善類顏其堂曰滋德

已上見舊志按舊志義行門有侯志勝今改入隱逸王思簡高擇今改入藝術

郭曰璉邑諸生居埠村鎮連鑿義井以贍衆又借館以立義學多所成就壽至八十餘歲

李大乾例貢生尙義好施比舍某欲售其居以償逋累爲設措保全之有里正欠官項代輸五十

金贖其罪壽至七十歲

已上見舊志
耆壽今改正

張之琢字荆玉父性嚴有小過輒杖怡受無怨色

父母歿哀毀過人與弟之琚篤友愛弟有積債鬻田宅償之乾隆丙午歲大饑道殣相望買粟平糶不給貸資足之楊鄭兩學官扁獎

隗文謨字昌周歲貢生嗜讀愛才嘗館七郎院莊張懷上幼穎悟貧不能讀文謨多方周給之懷上入泮食餼皆其力也後選泰安縣訓導未扞任而歿

張瑄早失怙奉母任氏教維謹家貧積餘貲刊印遏慾訓以勸人嘗路拾六十金訪知爲甯儼若物招而還之

章邱縣志

卷十一

人物志下
義行

六十二

楊錫楨睦鄉里息爭訟以德行著邑令申請旌其門

鞏榮德住鞏家莊性孝友莊爲南比通衢值雨多冰凜榮德創議修砌石道一百三十九丈子縉傳敦厚有行誼竝以好施樂善稱

張長貴性敦厚鄉里有貧乏者周以衣食乾隆七年邑令姜扁獎之

高識字明遠由監生援例授州同職如玠子樂善好施凡邑中營建事多賴贊襄而督修城池功尤著親友有負欠者雖重至千萬不償亦未嘗

逼索之或有以具控勸者曰能償不待索待索不能償又何訟爲時邑令蔡稱爲善人因以芝蘭氣味扁獎之嗣子慶長字餘久由監生援例授都司職亦樂施予有姊三人伯姊早故遺二女俱幼撫若已出比嫁授以田廬俾獲安飽三姊早寡無子薪米供給未嘗缺又謀其族立後嗣爲建坊表其節里族共義之

張心堦字良田敦厚務農樂任卹比隣賈姓貧予之田數畝不索值賈由此漸積稱小康子思健亦志篤敦睦嘗爲族人贖田宅終不以自德心

章邱縣志

卷十一

人物志下
義行

六十四

堦八十一歲思健七十九歲俱以優老給頂帶焦式泰字舒菴以商賈致小康慷慨好義有胞妹適霍門壻遠出無耗遂迎妹及甥養於家後以其田產三分之一俾甥有其一入共義之

張宣字濟九監生重義好施嘗於大寨莊鑿石爲井號爲張義井郡廩生蘭芷其曾孫也

張克剛字健資貿布至費縣值歲饑有咸某欲鬻其妻克剛助之金俾得完聚里黨有窮乏者每歲終必加周卹壽至八十三次子鳳吉性孝友長兄早世撫猶子成立壽亦八十三俱蒙 恩

賞

襲方印字康侯乾隆丙午大饑里人張廷舉謀鬻妻子以活其父母方印知之踵門曰勿爾我有菽粟尚可供朝夕麥將熟矣於是廷舉一家遂克完聚

高承華嘗拾遺金於道俟其人還之中年家稍裕所識窮乏有喪葬嫁娶事輒貸之金不責償有善人之稱

李遜字搗謙住大柏莊嘗捐地八畝零資社學膏火遇同里有急每傾囊助之

章邱縣志

卷十一

人物志下
義行

六十五

劉浴字沂濱年踰四十無子買蒙陰饑民女欲爲妾問知爲吳氏童養婦卽召女父還之

張興任字道遠監生樂施好義凡鄉人之有疾病喪葬嫁娶事及貧不能讀書與應試者輒爲之力年七十餘子孫成立克紹其家

李效曾字魯齋邑諸生多義氣鄉里有忿爭鬪訟者必多方勸諭令其無違言而後已居家勸農桑課讀亦皆有法

商繼魯住商家柳莊與安文舉治天倉嶺險道重磬馬跑泉修泰嶽行宮年至八十餘

吳志尙字越菴性恬退不求仕進熟性理周易訓人多用小學及先賢語錄居家以孝友稱里中有家庭不和者必稱引古人孝友事諄復開諭其人感泣而後已善草書卒年七十三
王有禮務農敦本乾隆丙午歲饑嘗散粟百餘石以濟貧乏嘉慶二十四年建坊時年一百三歲
蔡維柱監生乾隆丙午歲饑出粟助賑里無流亡者終年九十有六

趙繼興字丕振性孝友有子一而姪三析產時分田宅爲四而自取其一有貨錢者挾農具以償

章邱縣志

卷十一

人物志下
義行

六十六

息遂出券焚之更周以粟通醫遇貧者輒留家調治之曾孫鏞領鄉薦

張興儒字道傳邑諸生構康山園讀書課徒其中兼習醫求者無不應一方倚賴之

張道範號竹軒監生奉嗣母本生父母以孝稱乾隆庚寅前營莊被水請於有司得賑卹

劉自平字安然居西營莊少喜讀書後以家貧治生有子五人使各執一業逮成立悉以家事付之日往來里黨間以排難解紛爲已任所居村十數里間無訟公庭者

鞏延桂號蘭亭監生父亡撫幼弟成立所居臨獺
河秋夏間河水每溢出延桂倡議集貲築灰堤
袤四五里廣丈餘水患以息

史瑞儀字怡堂候選通判樂善好施製藥濟人雖
重貲不吝

李大猷字允升候選州同知篤行樂善乾隆間知
縣張萬青修邑志捐刻貲者大猷與貢生史丹
詔也

康汝綱字持三號秩倫候選州同知住明水鎮醇
厚好義父夢麟尙聲氣門外多長者車親知以

章邱縣志

卷十一

人物志下
義行

六十七

醫藥婚葬求助者尤無所恡汝綱必竭貲財以
博親歡而誨子弟與自奉則以勤儉爲務泊然
若寒素乾隆丙午大饑減削家計以所羨濟饑
者鎮西爲東西衝衢袤三里許近水易圯每夏
雨秋潦阻行人數運土倡築之壽八十二子三
季鴻安早卒亦尚義好施

楊宏勳父好施與弟宏道克承其志有友母死無
以爲斂爲經紀其喪宏勳壽八十餘宏道壽九
十

韓大愷武生品誼爲鄉黨所重邑令王扁獎之

韓永智號怡園其曾祖貢生與佐值歲饑賑恤貧
乏活人無算秉智乾隆戊子舉於鄉早喪母事
父克孝以詩文課其弟秉文秉經相繼入 刊
家乘倡族社每月朔則燕集一堂講敦睦之道
所居村東爲繡江滙流所橋梁傾圯雨潦時輒
爲患秉智竭力修治之以繼母老就教職選利
津教諭見學宮傾圯倡議修之教諸生以修行
明經爲務值院試同官何元錫歿於旅舍爲經
理其喪助歸葬焉後以乞養歸繼母亡哀毀成
疾卒年六十有九

章邱縣志

卷十一

人物志下
義行

六十八

韓麟第字玉書由吏員考授府經歷早喪父奉母
至孝撫幼弟成立樂施予族有孀婦柏氏嘗飲
助之得終其節壽百歲子之夔附貢生亦輕財
好施里鄰有告貸者無不應亦不責償鄉人多
感之孫爲諸生名衍晉

焦汝均性端嚴訓子孫以義里鄰有居室不完耕
穫不時者每出錢粟補助之壽至八十餘

馬國超字冠軍候選守備醇厚樂施里鄰中貧不
能婚者必竭力俛助於節婦孝子不時周以粟
帛嘗告子弟曰節孝之事貧者爲難能隨時周

卹可以慰其艱辛更可以勵其苦志也年六十有九終

張緒孟字繼輿樂施與族有姑婦孀居者竭力周給之邑令張曾灝清廉有賢聲以疾沒於署貧不能歸嘗以白金五百助之

焦汝謙字韋思寬厚容物行多義舉長子經邑諸生

袁可式字訓古住張官莊樂善好施有從姪喪親無依撫養之爲婚娶如禮夜中有竊伐樹者次夕復至可式責以大義其人愧欲行可式曰汝

終夜營營爲此樹耳速將去後其人改行自言人始知之壽八十二歲長子培基邑諸生次培統舉鄉飲介賔

王毓璜字公佩候選兵馬司吏目務敦睦尙義氣諸兄弟皆蚤世子若孫受其提携獲安飽游江南時同舟有誤傷人者出金爲解脫之

焦重祿家中貲尙義氣嘗貸友人五十金爲度歲資有踵門告急者卽以所貸與之

高振先字法坤諸生幼喪父事母以孝聞勅宗祠修族譜執經請業者先後百有餘人貧者却其

修脯兼助以衣食生平不議人長短壽八十子孫皆入膠庠

任思義監生住鄭家道口莊乾隆丙午歲饑輸粟賑救莊西小清河水漲決堤數丈捐金堵塞之有貸其金者不能償輒焚其券

李朝幹字廷弼住河南莊幼聘牛嘉祥之女未幾女病瞽牛氏辭婚時朝幹方七歲祖大正探其意慘然曰吾不忍也祖喜從其志既娶終身相敬如賓人以方宋劉庭式云

張肇鳳字瑞公監生嘉慶三年歲旱頓邱莊缺水鳳爲鑿石井一方稱便又於近地孤塚遇春秋節量給佃戶祭資令脩築以祭之

焦好施予有攜婦逃荒者婦將媿人莫肯留振舍諸外宅既媿貲遣之歸

張延芳字思馨好善樂施繡江橋傾圮延芳捐金與李朝勳倡修又於女郎山監裁柏樹三千株董掄賢性慈好義族有欲奪節婦志者掄賢怒責之且時調恤節婦以全其義壽至八十一歲

郝茂榕字靈岩紹宗子由舉人歷任汶上萊陽教諭條教有方兼通醫以濟衆爲心所得俸餘悉

周族黨匱乏者

韓守忠字丹宸孝事孀母以習騎射入武庠乃嚴戒其弟守恕讀書有成歲時周邨里黨有侵其田者讓弗與爭未中壽而歿

隱逸

漢白子友齊人成帝時隱居東平陵南棠山石室躬耕養母慮糧儲不繼因自食橡栗飲水以讀易神為夜降時朱雲陳咸皆自魯來師事之

唐邵貞一濟南人聞武后改年挈妻子入長白山結廬自養終身不入城市因自號長白山人已上人

章邱縣志

卷十一

人物志下
隱逸

七十一

據山東通
省志增補

宋穆賓字廷秀其先河南人遷居章邱女郎山之陽少有志操不樂仕進里中人皆稱曰君子熙寧初卒洛陽王壽卿為墓表詳見金石錄

元宋慶餘讀書勵行積學纘文以宿儒隱德為鄉里矜式見舊志
柏記

明侯志勝家極貧嘉靖間有沂州解銀大戶鄭鶴算遺銀百兩志勝拾之聞于官鶴算欲與之分固不受縣令扁獎扁懸戶內而逃曰名與利皆身

物也

見舊志
義行

胡東銘字鑑南善吟詠工金元詞曲隱居南村天

啟中縣令表其廬著有悅性錄

李光華字太鉉崇禎丙子歲貢悃幅無華潔身高

蹈一時稱爲隱君子

據李氏族譜增補

王時英字千甫生平倜儻不羈喜談兵擊劍明季

流寇之亂邑令委以干擲之任控禦有方尤雅

好古文歌詞後乃屏迹西村不入城市與隱士

張元明輩結塵外交壽至八十五歲子濂孫大

年俱名進士邑人焦毓瑞爲之傳

見舊志儒林

張光啟字元明邑諸生崇禎末漕撫朱欲薦諸朝

章邱縣志

卷十一

人物志下
隱逸

七十二

光啟固辭遂滅跡城市隱居白雲湖之濱以詩

酒爲樂卒年八十餘著有自娛草四卷

已上見舊志

國朝弭光崇字華先邑諸生性愛潔好客工詩蕭然有

物外之致淄川張篤慶爲之傳

見舊志儒林

張芬字德馨號坦菴選貢生立品嚴峻喜吟詠前

令鍾欲招致之敦促再三始一至寒暄外無一

語別去鍾目送之曰此今之滅明也

據山左詩抄增補

周元章字佩環北盤泉人事繼母至孝博學強記

兼通真草篆隸書尤善畫繪家貧四壁立蕭然

自得暇輒臨風鼓琴披篋垂釣知交有欲助以
巨資援例補官者元章固辭不受縣令張萬青
修志書以幣聘之辭乃爲畫志中諸圖年八十
餘歲子汝浩邑諸生

胡澍字兩沛博覽羣書不樂仕進構茅屋鑿小池
日吟詠其間妻亦勤於蠶織有隱士風

藝術

明社世威顏莊人受異人術善祈禱如響應嘉隆間
劉白川邛月林欲薦之朝固辭不應

陳得祥普濟人少好元學嘗遇一黃冠傾蓋語合

章邛縣志

卷十一

人物志下
隱逸

七十二

因授太素脈訣語之曰世所傳脈經脈訣大謬
汝持此遊人世可無兩手里人多不之信乃
北至燕試其術奇驗名大著縉紳招之無虛日
後歸里邑令董復亨顏其門曰長桑真脈

光霽寰善畫能詩尤工小幅寫意性嗜酒饒有風
致

李煒字屏巖張家林人與王春山字小村俱諸生
及張洵字西泉陳月山凡四人皆以醫名于世

據間居
集增補

李觀字洞開通醫濟人若渴至老不倦

據李氏族
譜增補

國朝侯夷門善畫晚年潑墨更簡遠入妙

王生周業岐黃與翟玉華齊名李柔克字從仲與生周比鄰爲莫逆交慕其術購經方日夜讀王聞輒大笑柔克知王有潔癖乃伺其下榻處跣足灑掃率以爲常王心異之一日佯出逾時歸則李適役焉自是傾心指授如師弟歲餘曰奪我席者必從仲也然我死乃顯生周歿李名大著會邑令女病延之醫飾一婢置幕中試之診畢語令曰無病且脈賤非公女也令大驚異女服其藥一夕而愈又嘗診歷下李友馨預決

章邱縣志

卷十一

人物志下
藝術

七十四

其有貴子後子衮果以進士爲禮部主事生周嘗稱玉華爲七分醫已五分柔克可三分著有脈訣珠囊集歿後李樹敏爲之合傳焉

牛元佐字紆扉雍正癸卯副貢生習岐黃術所治多奇效後之習醫者猶遵其遺書用之

據採訪
增補

李佩字斑麓通醫有孕婦某患閉結李診畢謂其夫曰只須倒持搖之可無藥也夫如言遂愈詰其故曰胎動下垂耳同里某自命傷寒專門遘疾自治弗效素嫉李其兄與李善爲延之一服而廖歷任邑令皆嘉獎之

張鑿歲貢生志尚高雅繪短幅山水閒遠入妙
呂越邑諸生業醫值時疫薰染多暴死越施方藥
全活甚衆尤善痘疹科有延者溽暑沍寒必往
邑令席扁獎之

王毓樸字子實值母病求良醫不獲母亡毓樸深
以不自知醫爲恨遂棄帖括之學究心岐黃者
十載竟以醫名診脈能洞達病源預決死生邑
令楊有詩贈之

王思簡進士王忻孫篤學敦行素解醫尤精痘疹
科遇貧者拯卹之餽遺一無所受壽八十三子

章邱縣志

卷十一

人物志下
藝術

七十五

者佐孫居敬以讀書世其家

高擇習岐黃術求無不應家貧不受餽謝壽九十

四邑令馬扁獎之

已上二人見
舊志義行

已上目舊志

張鑿汝蘊曾孫工繪事鍾志諸圖悉出其手

高如崐字峻甫以儒術治岐黃融貫諸書投劑輒
效著有傷寒摘要藏於家孫澤長亦以醫名世

邑令張扁其門

焦現通醫每以藥餌濟人

焦汝桂諸生通醫有醫學良方四卷族弟焦汝朗

郡增生通星經所占多奇驗焦爾鈞書法篆刻
皆工尤善繪山水

胡元懋善岐黃術著有胎產方脈集要邑令嚴扁
獎之嘉慶丙辰給頂帶壽九十有四

呂希舜字慎徽父越所集醫鏡及靈素諸書讀之
得其要領遂通醫其從子純嘏亦以醫世其家
李克廣字德心監生慎修次子得吳六吉診脈術
能知人天壽貴賤著有醫學尋源十卷次子體
誠得其傳尤好施予遇疾貧乏者輒解囊醫治
康士珩字楚白嘗師名醫王長明得其傳救人疾

章邱縣志

卷十一

人物志下
藝術

七十六

苦不受餽遺著有傷寒易簡錄一卷後以痘疹
術授其族孫如浩以內科術授從孫如英皆以
醫名一時

徐繩武因母病學醫遂通其術著有銘心醫錄
張子宏與李啟承並攻醫當時有子宏善補啟承
善攻之語

張應光習醫尤善痘疹科

李承泰住壇上莊嘗拾異書歲旱祈雨頗驗

蘇松字帶湖習醫六十年尤善外科應手多奇效
邑令張扁獎之

高振方字休亭少習舉業屢試弗售乃學醫以醫
名尤精痘疹科

郭允執諸生工琴狷潔自好邑令王延之課子弟
不三日卽辭歸

李迺舒諸生善書能畫

胡體申字受天善畫山水花卉俱入妙

魏秉燹字本初諸生性坦白工翰墨善畫終南進
士像尤奕奕有神

孟傳昔字君重號雲岩耽書畫以江南卓滋爲師
而風雨竹過於卓行草悉師鄭燮

章邱縣志

卷十一

人物志下
藝術

七十七

劉瑄住井家莊習瘍醫性廉介不受餽謝出貲製

藥餌濟人雖老邁未嘗辭勞鄉人德之

郝茂椿字鄰霞廩貢生紹宗子俊逸超拔以文章

名世尤工書畫有灑然出塵之致

隗良能善醫痘疹

馮聯松字秀嶺好義通醫刀圭所投每有竒效新

城舉人伊訓爲之傳

耆壽

國朝康國墉壽九十七歲康熙丁亥

賜頂帶子丕颺壽八十八歲

據墓碑
增補

王養民字皞如康熙五十二年祝賀

寓壽賜頂帶黃衣拐杖時年八十一壽至九十一歲

隗天佑字申之雍正二年奉

上諭民間勤勞儉樸身無過舉老農州縣各舉一人給以頂

帶縣令張以天佑舉

王忍字百忍性孝友樂義好施邑令旌其門乾隆

元年給頂帶年九十餘

栢福通五世同居雍雍循禮法務農課子邑令李

扁獎之孫二人先進縣學生士璉歲貢生曾孫

廣思領鄉薦雍正八年壽百歲終

章邱縣志

卷十一

人物志下
耆壽

七十八

郭國瑞邑諸生好施樂善邑令以聞

賜帛二次壽至九十八歲

郭琬誠實端方康熙年邑令扁獎壽九十餘歲

劉正福壽一百一歲雍正七年邑令李扁獎

據採
訪增

補

高可嘉廩生增學祖年九十六給頂帶邑令毛扁

獎之

劉鞏基乾隆元年給頂帶邑令扁獎壽八十有四

子如鈞孫澤長澤深皆邑庠生

李進福性孝友睦族濟貧以老壽給頂帶

陳繼昌性孝友乾隆元年給頂帶時年八十餘邑

令毛表其間

馬雲梯乾隆三年給頂帶時年八十餘

闕世臣端方謹慎壽百有二歲乾隆十二年建坊

郭坤年九十餘德行著於鄉乾隆十三年

賜銀牌後又賜銀兩

蔡錫印年一百有四歲乾隆十八年給頂帶建坊

張欽篤友愛樂施與壽至八十有四

已上見舊志內有郭曰璉李大乾今改入義

行

章邱縣志

卷十一

人物志下
耆壽

七十九

王欣然王瑞然住西頓邱莊兄弟也乾隆二十七

年欣然一百三歲瑞然一百歲有司具以聞奉

旨各賞給上用緞一疋銀十兩

勅建熙朝雙瑞坊並頒

御製詩一軸

詩詳金
石錄

高如岫候選州同知乾隆三十六年

巡獻賦蒙

恩賞壽域祥徵四字黃緞一疋時年九十五歲

李盛猷壽百四歲乾隆三十八年蒙

賜頂帶黃衣拐杖及褒榮耆德四字

李含貞住佛塔頭莊乾隆年

東巡賜頂帶黃衣拐杖壽八十餘

胡元亨監生乾隆五十年恭與千叟宴頌

御製詩方竹杖金銀牌補服 緞紗綾各件

高憲諸生乾隆六十年恭與千叟宴

賜黃衣銀牌拐杖壽八十餘

鄭文玉字美斯贊授千總職樂善好施乾隆六十年恭與千叟宴頌

御製詩一軸黃緞外褂拄杖搬指烟壺荷包各件

馬名捷字連三候選守備乾隆六十年恭與千叟

章邱縣志

卷十一

人物志下
耆壽

八十

宴頌

御製詩一軸鳩杖如意荷包各件

李之清壽一百一歲乾隆二十七年建坊

李云周壽百二歲乾隆三十六年建坊

朱奉五世同堂壽百歲乾隆三十七年建坊

劉詩壽百二歲乾隆五十五年建坊

杜均瑞壽百七歲乾隆五十九年建坊

李巽宮壽百二歲乾隆六十年建坊壽至百八歲

李疏源壽百二歲嘉慶二十五年建坊

鄭汝忠字誨菴贊授千總職子三思遠監生芳蘭

膺鄉薦思适登仕籍五世同堂道光十二年建坊旌獎

李文鼎字振九乾隆三十九年給頂帶壽九十一
王維仲諸生五世同堂壽八十餘歲邑令張匾獎
王湘川壽八十二歲蒙 恩賞

李傑士李文侯諸生李賢士住麻稽李浦住南岡
李法南住傳莊李志良住佛塔頭陳興能住樸
莊柏珞柏繼考住大柏莊于顯名揚名兄弟住
海套園柏世河柏世水柏世清兄弟三人住松
柏莊鄭電鄭立甲鄭立佐住海套園子堯羲住
于家莊李三才宋仙住西山莊均於嘉慶元年
給頂帶壽皆八十餘

章邱縣志

卷十一

人物志下
耆壽

八十一

王文俊住普集鎮壽九十有九王大富住王家柳
莊壽九十有八楊悅先住黃家莊壽九十有六
徐祥住西山莊壽九十有四王承壽九十有二
于潤住朱公泉壽九十歲張國順字子和壽八
十四歲韓鵬雲壽八十有二均於嘉慶元年給
頂帶

周興凝

末一字恭避
御名

壽九十餘給頂帶

竇欣祖字悅先性孝友以老壽給頂帶

劉錦文住大柏莊嘉慶元年給頂帶壽七十餘劉
曾文字貫一增生居鄉黨以淳厚稱壽八十有
七劉嵩字維嶽喜爲詩壽八十

石發芝壽九十九歲嘉慶元年給頂帶于盡祥壽
亦九十九歲盡祥子興林壽八十四歲
李坤配性孝友嘉慶元年給頂帶武城教諭畢岱
薰表其閭

張輝字光遠與弟統弟緇友愛甚篤同爨內外無
間言邑令嚴扁獎之輝壽至九十歲統五世同
堂邑令張扁其居統壽九十歲緇壽八十五歲

章邱縣志

卷十一

人物志下
耆壽

八十二

俱蒙

恩賜頂帶

馬錦字西川持躬正直睦族濟貧鄰有某氏婦夫
出無耗姑以貧故欲使改適錦聞亟周之得以
保聚後夫回奉金致謝辭不受壽九十八歲嘉
慶二年蒙

恩賜頂帶及銀兩二次

焦清強壽八十八歲嘉慶二年給頂帶
劉璞忠厚節儉道光元年給頂帶壽八十五歲
陳宗堯壽八十歲嘉慶二年給頂帶撫臺伊扁獎

之

陳克善陳克唯兄弟也俱以老壽給頂帶

靖思義字方亭勤儉尚義有子八人壽至八十一

歲給頂帶

王文亮字明遠壽至八十餘給頂帶

董敦孝壽八十五歲蒙 恩賞

梅貴住梅家莊壽九十七 恩賞三次

彭來時道光二年給頂帶現年八十五歲

任永祿五世同堂監司常府憲嵩教授劉俱扁獎
之壽八十六歲

章邱縣志

卷十一

人物志下
耆壽

八十二

史輝宗監生六世同堂縣令以聞顏其堂曰慶衍

元來壽九十餘

高廷吉事繼母以孝聞年七十餘孺慕不衰壽八

十一歲儒學張扁獎之

史由義五世同堂壽八十餘

孟可舉字書升諸生孝謹敦睦壽八十五歲

李考士李克信住大柏莊勤耕稼壽俱八十有三

侯世持住侯家莊壽九十六

胡蘋字南濱附貢生壽八十一

彭希彭邑諸生好吟詩壽八十二子亦礪孫爾慎

爾慧俱庠生

李璟字方宋監生恂恂樂善壽九十四歲

趙名儒監生壽八十一歲

高注字百川增生善書喜植菊五世同堂壽至七

十九歲邑令王扁獎之

高名達郡增生事母至孝壽八十四歲

劉大濩性純孝壽八十歲

張顯栗冢峪人壽八十一歲

袁作孚廩貢生之升曾孫纂輯遺文克承家學五

世同堂壽九十餘歲

章邱縣志

卷十一

人物志下
耆壽

八十四

包大有壽九十餘歲

袁柱壽八十七歲

劉鴻章壽八十四歲

牛麟祥壽八十九歲

韓峻峯壽八十四歲

張欽世壽八十八歲

張仁和壽八十七歲

劉元炳壽八十九歲

張志文善醫壽八十九歲張志聖張志密壽俱八

十四歲

郭鉉性孝友樂施與壽八十歲

劉珍劉琮兄弟同乳而生最友愛珍壽九十琮壽

八十子孫三十一人

焦汝彪壽八十歲

焦仔壽八十六歲

程雙恒壽九十三歲

馬俐壽八十五歲馬棚壽八十歲

王學義王學商兄弟學義壽八十四學商壽八十

三

李中涵壽九十四歲

章邱縣志

卷十一

人物志下
耆壽

八十五

李功馨字聞遠郡庠生壽八十一歲

王光輝現年九十三歲

張效曾訓子中元入邑庠現年八十五歲

袁世春五世同堂現年八十五歲

李凝華監生現年八十五歲

李承順五世同堂現年九十二歲

張夢麟字景星貲授把總職建宗祠置祭田修家

譜現年八十一歲

高泰來郡庠生現年八十二歲

孟繼堯監生現年八十二歲

張廷機善針灸術於人無所取立義學以教鄉

子弟現年八十歲

張汝寬現年八十四歲

韓本桂監生五世同堂現年八十七歲

韓相現年九十三歲

高承芹監生急公樂施子樹嶠候選訓導現年

十二歲

馬魁齡武生現年八十歲

王廷坤現年九十歲邑令吳扁獎之

張永澤現年八十四歲

章邱縣志

卷十一

人物志下
耆壽

八十六

王延祚現年八十二歲

趙文思現年九十二歲

焦式雍現年八十九歲

焦余統現年八十六歲

孟繼讜字廷棟監生 亞聖裔現年八十五歲

宋綵樸實務農現年八十一歲

董可思李瑞英醇謹無過現年俱八十四歲

李思義敦宗誼現年八十四歲

柏成邑現年八十四歲

柏振子修東陵觀及九龍潭現年八十三歲

段朝相字貴卿現年八十六歲

游文瀚鄉飲介廩五世同堂現年七十四歲

趙明仁樂善好施比鄰掘地露枯骨明仁捐地葬

之現年八十餘歲

劉增現年八十二歲

尹璋監生現年八十餘歲

孟毓茂現年八十一歲

柏進美柏進言族兄弟勤稼穡訓子孫進美八十

九歲妻陳氏八十六歲進言八十歲妻殷氏八

十一歲

章邱縣志

卷十一

人物志下
耆壽

八十七

宋汝正八十九歲妻張氏九十歲

韓芳午八十五歲妻王氏八十九歲

張緒學八十六歲妻李氏八十四歲

張檀林八十八歲妻謝氏九十三歲

許泮八十三歲妻陳氏八十五歲

王國臣八十三歲妻張氏八十二歲

馬篤誠八十三歲妻畢氏八十一歲

高英監生九十歲妻劉氏亦九十歲五世同堂邑

令傅扁獎之

韓鳴九現年九十一歲妻穆氏九十三歲

高昇龍現年九十四歲妻王氏九十三歲

王其魁監生現年八十二歲妻李氏亦八十二歲

李敬德現年八十八歲妻韓氏八十六歲

高士美現年八十五歲妻楊氏八十七歲

已上五人道光十二年邑令吳扁獎

流寓

宋田誥字象宜歷城人隱嵩山後愛明水水樹遂家

焉淳化中門人韓伾薦之朝詔書及門而卒制

作百餘篇傳於世每搆思匿深草中俄躍出一

篇成矣

見灑水燕談

章邱縣志

卷十一

人物志下流寓

八十八

范仲淹字希文吳縣人官至參知政事嘗讀書長

白山醴泉寺煮粥作四塊斷齏數莖早晚啖之

見窖金不發及爲西帥乃與僧出金繕寺

按醴泉寺唐宋時屬章邱後始入鄒平

金朮虎通丞相高琪子琪爲相頗專擅以罪死而當

時用事之臣方修舊怨欲甘心於通通懼與其

弟道携家亡命至章邱寄居焉厥後子孫去虎

字以朮爲姓

明劉應節號白川萊州濰縣人嘉靖丁未進士所至

以宦業顯總督薊遼威望尤著晉刑部尙書萬

歷己卯上疏乞歸道出章邛見山川形勝遂置田宅將爲終焉計先是用皖人吳定石議已遷封君墓於縣東長白楊緒之間應節居二載歸濰縣卒

蘇洲號雪簑道人杞縣人幼落魄江湖嘉靖丙午寄居章邛與李太常開先遊洲工琴工琵琶能歌吳曲又善草書大至盈丈筆勢飛動見者驚謂顛素復出嘗作風入松八十一闋譎怪離奇皆非人世間語好劇飲醉後袒臂大叫旁若無人李太常爲之傳

章邛縣志

卷十一

人物志下
流寓

八十九

張國珍字佩玉號雲霞河南連川郡人內修外養學有獨得出而遊四方多被苦留數來章邛李太常開先奇其術而重之禮遇有加雪簑道人之流亞也

見間
居集

葉溶號小塘徽州人少習兵家言與曾襄愍謀復河套襄愍死溶匿姓名往來燕趙齊魯間與琅琊邛小宰夷維劉司寇善萬歷甲午寄居章邛年七十九矣聞倭亂欲上疏自効與之談邊事娓娓不倦著有內外策二十餘篇

張自慎字敬叔號就山商河人少爲邑諸生負才

藻拓落不羈來章邛卽家焉遊太常李開先之門開先不輕許可見自慎亟加賞歎曰老夫衣鉢須此子張大之自慎工詩文尤善金元樂府嘗著雜劇三十餘種太原萬伯修每向人曰北曲一派海內索一解人不可得眼中獨見張就山耳其爲名流所重如此

雲生起字從龍不知何許人萬歷辛亥來章邛灑脫善談工書能吟詠以水墨寫花卉生動有意態作山水亦淡遠有致晚兼精岐黃以老壽終已上見舊志

章邛縣志

卷十一

人物志下
流寓

九十

顧炎武崑山人有田宅在章邛見胡德琳
歷城志

舊志流寓載柳下惠甯戚鄭康成按柳下惠魯之公族其至齊無明文卽境內蹠山有其弟遺跡亦不得因此卽以惠人流寓甯戚衛人仕於齊雖邑中有甯戚城或爲其食采之邑然以之人流寓則不可康成讀書處不在章境詳見山水考今竝刪去復取可據者補入之

朱曾傳字式魯歷城人乾隆丙子舉人以避囂移於邑明秀鄉之頓邱莊因家焉淹貫諸書文辭

瞻麗著有式魯詩文集

方外

周白兔公長白山人事吐納之術得長生神仙交感

傳云是彭祖弟子常騎白兔往來如飛因稱爲

白兔公唐韓翊送齊山人歸長白山有舊事仙

人白兔公之句

據山東通志增補

晉元陽子長白山人於伏生墓中得金碧潛通書細

爲註解得還丹訣在華陽宮修真十九年仙去

據郡志增補

元僧守志姓吳淮南信陽軍人元初南征有從軍大

章邱縣志

卷十一

人物志下方外

九十一

醫劉君將守志還章邱住經一十三禩守志入

舊軍永興寺從海公祝髮冬夏一衣淡泊寡營

歸寂時沐浴更衣端坐而逝異香馥郁遠近咸

聞火餘得五色舍利衆異之

據行業碑增補碑在舊軍鎮

葆光子姓郭不知何許人嘗居女郎山之三陽洞

學鍊神服氣術土人相傳於此得仙云

郭志空字超然號長春真人嘗遇異人傳秘法遂

不卧善運氣久之聞於朝賜金冠錦服今城西

北六十里有村名郭太師庵其祠在焉或云卽

葆光弟子號明德真人

已上二人見舊志

明僧無住俗姓張魯之林棠人明時卓錫繡江寺衆議裝佛像無住曰無須旣而銅佛三軀浮流而下泊寺側遂舁歸寺又募修繡江橋時方三月偶一瞑目醒謂衆曰江南麥秀漸漸將熟矣因出袖中麥穗示衆涅槃數月人於江南見之言笑如平生

據繡江寺碑記增補

國朝畢太和順治初衲衣芒鞋絕烟火食能預知年九十五終於胡山之巔

章邱縣志

卷十一

人物志下方外

九十二

祠字康熙丁未造千佛毘盧像後人名其所居之峯曰摩訶頂

韓云朋小孫官莊人幼沉靜長通儒術其兄欲爲議婚遂潛出棲身盤鶴峪爲道士後其家人至以小甌進糕終十數人飽而糕不加損又嘗瞑目移時而往借會仙山人茶以款客且預知歿期及歿或遇於江南道上或遇於勞山中至今以仙名之

雲光侯家莊人後爲朝陽寺僧能吟咏邑人李慎修輩嘗與之倡和爲方外友

淨崑長山劉氏子讀書弗就年三十五入靈鷲寺

爲僧建毘盧閣觀音殿乾隆年

聖駕東巡淨崑迎

鑾賜紫衣一襲金剛經一部號秀峯大師

章邱縣志

卷十一

人物志下
方外

九十三